

MBAMBA FOE ANE YÔHANES A NGA TILI

Ajôô A Nga Nyoñe Nyôle Nyôle Môt

1 1 Osusua Ajôô a nga too, Ajôô, Ajôô a nga too e be Zambe, Ajôô a nga too Zambe. 2 Nnye a nga too ôsusua e be Zambe. 3 Nnye a nga bo biôm bise, teke'e jôm jia é né é nga boban nye momo. 4 Enyiñ é nga to e be nye, ényiñ éte é mbe éfufube bôt. 5 Efufub éte j'afaé e dibi été, ve dibi teke'e je dib.

6 Môt éziñ a nga too, Zambe a nga lôme nye, a too jôé na Yôhanes. 7 A nga zu bo ngaa, ane a ye kañete ajô éfufub éte, nde ete bôte bese be ne buni amu nye. 8 Sa émien nnye a mbe éfufup éte, a nga zu na a kañete'e ajô éfufub éte. 9 A mbe nya éfufubu a faé e be môt ase a zu e si nyô. 10 A nga too si nyô, nnye a nga bo si nyô, ve si nyô teke'e yeme nye. 13 A nga zu e be biôme bié, ve bôte bé teke'e nyoñe nye. 12 Ve abime bôt e nga nyoñe nye, a nga ve de ngul ya bo bone be Zambe, nde d'abuni jôé dé ; 13 balé bete be nji bialé a metyi, nge nkômbane ya minsôn, nge nkômbane môt, ve wu Zambe.

14 Ajôô a nga nyoñ nyôle môt, ane a nga tabe e be bia, bi nga yen étôto'o jé, étôto'o ane ji Atyi'i Mon d'aso e be Esa, njalan a mvam a benya mejôô. 15 Yôhanes a nga kañete ajô dé, a yôtane na, Nyina a ne nyô me nga jô na, Môt a zu me mvus , a dañe ma, amu a mbe me ôsu. 16 Amu njalane wé, bia bese bi nga nyoñe mvam, abui abui. 17 Amu vôme Môze a nga kalane bia metiñ, Yésus Krist a nga zuu bia mvam a benya mejôô. 18 Teke'e môt a nga tame yene Zambe, Atyi'i mone Zambe é too Esa e tôé, nde a nga kulane nye.

Nkañetane Yôhanes Baptist

(Mat 3 : 1-12 ; Mark 1 : 2-8 ; Luk 3 : 15-17)

19 Wuna ô ne nkañetane Yôhanes, éyoñ Beyude be nga lôm beprêtre a Lévit be so'o Yérusalem, a sili nye na, Womien ô ne za ? 20 Ane a nga mem teke'e kat ; a nga meme na, Me nji bo Krist. 21 Nde be nga sili nye na, O ne ñhe za ? Ye ô ne Elias ? Ane a nga jô na, Me nji bo nye. Ye ô ne nkulumejô éziñ ? Ane a nga yalane na, Kokoo. 22 Ajô te be nga jô nye na, O ne za ? Ane bi ne ve ba be nga lôme bia éyalan. W'ajô aya ajô dôé womien ? 23 Nye na,

“ Ma me ne tyiñe nyô a yôtane e nkôte si,

Sô’ane zene nti zôsô, ”

Aval ane Yesaya nkulumejô a nga jô. 24 Ba be mbe minlôman be nga so e be befarésias. 25 Ane be nga sili nye na, nde ñhe, w’abaptizô bôt amu jé, nge womien ô nji bo Krist, nge Elias, nge nkulumejô éziñ ? 26 Yôhanes a nga yalane be na, Ma m’abaptizô a mendim. Môt a tele mia zañ, mi ne te yeme nye, 27 Môt a zu me mvus, me ne te yiane na me kuli nye nkole silefas. 28 E mam ma me nga bo e Bétania, e Yordan yat, e vôm Yôhanes a nga too a baptizô bôt.

Mon Ntômba Zambe

29 Tyé kpwa, a nga yene Yésus a za’a e be nye, ane a nga jô na, Mi lôô, Mon Ntômba Zambe, nyô a vaa abé ya si nyô. 30 Nyina a ne nyô me nga jô ajô dé na, môt a zu me mvus, a dañe ma, amu a mbe me ôsu. 31 Mamien me mbe te yeme nye, ve amu a yiane litiban e be Israël , ajô ete nde me nga zu baptizô a mendim. 32 Nde Yôhanes a nga kañete a jô na, Me nga yen Nsisim ô sisik aval ane zum j’aso e yôb, ô tabe’e e be nye. 33 Mamien me nji yeme nye, ve nyô a nga lôme ma, me baptizô a mendim, nnye a nga jô me na, Nyô w’aye yen Nsisim ô sisik a tabe e be nye, nnye a ne nyô a baptizô a Mfufub Nsisim . 34 Mamien me nga yen, a kañete fe na, Nyina a ne Mona Zambe.

Beye’é Be Osu

35 Tyé kpwa ya valé, Yôhanes a nga tebe ba beye’é bé bebaé ya beye’é bé. 36 Eyoñ a nga yene Yésus a wulu’u, ane a nga jô na, Mi lôô, Mon Ntômba Zambe ! 37 Nde beye’é bete bebaé be nga wô’ô a kobô’ô, ane be nga tôñe Yésus. 38 Ane Yésus a nga veñesan, a yene be be tôñe’e nye, a nga jô be na, Mi ajeñe jé ? Ane be nga jô nye na, A Rabbi (ajô ete d’atinane na, A Nye’ele), ô too vé ? 39 A nga jô be na, Za’an, mi yen. Nde be nga ke, a yene vôm a nga too ; ane ba be nye be nga tabe môs ôte ; a mbe bebé ane mewolo awôm. 40 Andréas, monyaña Simôn Pétrus, a mbe môte wua ya ba bebaé be nga wô’ô Yôhanes a kobô’ô, ane be nga tôñe nye. 41 Nnye a nga taté yene monyañe wé émien Simôn, a jô nye na, Bi yeneya Mésias (ajô ete d’atinane na, Krist). 42 Ane a nga zuu nye be Yésus. Eyoñ Yésus a nga lôbô nye, a nga jô na, Wo ô ne Simôn, mona Yôhanes ; w’aye lobane na, Kéfas, (ajô ete d’atinane na, Akom).

Yésus A Loene Filip Baa Natanel

43 Tyé kpwa, Yésus a ye'e ke e Galiléa, ane a nga yene Filip. Nde a nga jô nye na, Tôñe'e ma. 44 Filip a mbe mô't ya Betsaida, nlam Andréas baa Pétrus. 45 Filip a nga yene Natanel, a jô nye na, bi yeneya nyô Môze a nga tili ajô dé e kalate metiñ, a bekulumejô fe, nnye a ne Yésus mona Yôsef, mô't ya Nazaret. 46 Ane Natanel a nga jô nue na, Ye jôm é ne mvaé é ne ngul ya so e Nazaret ? Filip a nga jô nye na, Za'a yen. 47 Yésus a nga yene Natanel a za'a e be nye, ane a nga jô ajô dé na, Mi lôô, bebla mon Israël, medu'an me nji bo e be nye ! 48 Natanel a nga jô nye na, W'ayeme ma, aya ? Yésus a nga yalan a jô nye na, Te yene Filip a za loene wo, éyoñ w'ato élé fige si, m'ate yene wo. 49 Natanel a nga yalane nye na , A Rabbi, ô ne Mona Zambe ! O ne Njô bôt ya Israël. 50 Yésus a nga yalan a jô nye na, Ye amu m'ate yene wo élé fige si, nde w'abuni de ? W'aye yene mam m'adañe mam ma. 51 Ane a nga jô nye na, M'abele fo'o ane m'ajô mia na, Mi aye yene yôb e ñyoo, a beéngéle be Zambe be betek, be sisik, e be Mone mô't.

Esulan Aluk Ya Kana

2 1 E môse lale be nga bo ésulan aluk e Kana ya Galiléa, nyia Yésus a mbe wôé. 2 ane a nga bañete fe Yésus ba be beyé'e bé, be zu ésulan aluk. 3 Nde, éyoñ wain a nga man, nyia Yésus a nga jô nye na, Be nji fe bi wain. 4 Ane Yésus a nga jô nye na, A minga, bia wo bi ne za ajôô ? awolo dam e ngenan te kpwaan. 5 Nyia wé a nga jô bevolô na, Jam ese a jô mia, bo'ane de. 6 Minka'a mendim misaman mi mbe wôé, ntelan mfa'a ya Beyude be nga bo be tunu bebien, nka'a ôse ô mbe lita mewôme zañbwal nge ntet. 7 Yésus a nga jô be na, Jala'ane mendim e minkak. Ane be nga jalé mie, akui e minka. 8 Nde a nga jô be na, Bietan éyoñe ji, mi ke liti mba'ale ésulan. Ane be nga ke liti. 9 Eyoñ mba'ale a nga tye'e mendim me veñsaneya wain, te yeme mfa'a j'ate so, ve bevolô be nga biete mendim be nga yem, a nga loene nlu'u minga, 10 a jô nye na, mô't ase a taté telé mbamba wain, nde éyoñ bôt be nga sok, a ye télé nyô a ne te dañ mvaé. Wo ô ba'aleya wain a ne mvaé azukui éyoñe ji. 11 Nyina é ne ndem ôsu ya mendem mé, Yésus a nga bo e Kana ya Galiléa, a liti étôto'o jé ; ane beye'é bé be nga buni nye.

12 Mvus éte a nga lumbu e Kapernaum , émien a nyia wé, a bobenyañ, a beye'é bé ; ane ane a nga tabe wé abe melu.

Yésus A Fubu Tempel

(Mat 21 : 12, 13 ; Mark 11 : 15-17 ; Luk 19 : 45, 46)

Rev. Matthias MEYE
Secrétaire Général 1961.....

13 Nde, Paska Beyude é mbe bebé ; ane Yésus a nga bet e Yérusalem. 14 E Tempel été a nga koé ba be nga bo be ku'ane binyaka a mintômba, a bezum, a befolane moné, be too si. 15 Nde a nga bo nkasa minsinga, a titane bise e Tempel, mintômba a binyaka bibaane. A nga kute fe mona befolane moné e si, a só'ólô betawôlô bap. 16 Ane a nga jô bekuane bezume na, Va'ane biôme bina vôme nyô ; te boane nda Esa wom nda abom. 17 Beye'é bé be nga simesan ane e mbe ntilane na, Nyanan m'anyane nda jôé w'aye jiane ma. 18 Ajô ete Beyude be nga yalane nye, a jô na, Zandeme w'aliti bia, amu w'abo mam ma ? 19 Yésus a nga yalan a jô be na, Tyamane Tempel nyô, a m'aye beta télé nye melu mela. 20 Ajô et beyde be nga jô na, Tempel nyô a nga lôñeban mimbu mewôm menyin a misaman. Ye wo w'aye beta télé nye ve melu mela ? 21 Ve a nga kobô ajô tempel ya nyôle jé . 22 Nde éyoñ a nga wômô akôlô miñwuan, beye'é bé be nga simesan ane a nga jô njôane wu ; ane be nga buni mintilan, a mejô Yésus a nga jô.

Yésus A Yeme Bôte Bese

23 Nde éyoñ a nga too Yérusalem, melu'u me ébe'e Paska, bôt abui be nga buni jôé dé, ñyenan be nga yen mendem a nga bo. 24 Ve Yésus a nji kee jam ete e nlem mfa'a wob, amu a nga yeme be bese, 25 nalé fe amu a nji jeñe na, mô't a kañete nye ajô mô't éziñ ; amu émien a nga yeme jam e ne mô't e nlem été.

Yésus Baa Nikôdémus

3 1 Ve mô't éziñ ya Befarésias a mbe valé, jôé dé na, Nikôdémus évete Beyude. 2 Nnye a nga zu be nye alu, a jô nye na, A Rabbi, bi ayeme na, ô ne ñye'ele, a nga so e be Zambe, amu teke'e mô't a ne ngul ya bo mendem w'abo, te na Zambe a ne e be nye. 3 Yésus a nga yalan a jô nye na, M'abele fo'o ane m'ajô wo na, Mô't a se ngul ya yen éjôé Zambe, te na a beta bialé. 4 Nikôdémus a nga jô nye na, Mô't a ne ngule ya bialé aya, éyoñ a nto nnôm ? Ye a ne ngul ye beta nyin abume nyia na, a bialé ? 5 Yésus a nga yalane na, M'abele fo'o ane m'ajô wo na, Te na mô't a bialé a mendim a Nsisim, a se ngule ya nyiin éjôé Zambe. 6 Jôm é ne mbialan a minsôn, é ne minsôn ; a jôm é ne mbialan a Nsisim, é ne nsisim. 7 Te semé ane m'ate jô wo na, Mi ayiane beta bialé. 8 Evuñulu j'avuñ vôm j'akômbô, a w'awô'ô je éduñ, ve ô ne te yem mfa'a j'aso, nge mfa'a j'ake. Mô't ase a nto mbialan a Nsisim a ne aval ete. 9 Nikôdémus a nga yalan a jô nye na, E mam ma me ne ngul ya boban aya ? 10 Yésus a nga yalan a jô nye na, Ye wo ô ne ñye'ele ya Israël, ô ne te yeme mam ma, M »abele fo'o ane m'ajô wo na, bi akobô jam bi ayem, a jam bi yeneya, nde ete bi akañete, ve mi ne te nyoñe nkañetane wongan. 12 Nge m'akate mia mam ya si nyô, mia te biuni, mi a ye buni aya nge m'akate mia mam ya yôp ? 13 Teke'e mô't a nga bet e yôp, ve nyô a nga sis a so'o yôb, nnye a ne Mone mô't. 14 Nde aval ane

Môze a nga bete nyo yôb e nkôte si, aval ete Mone môt a yiane beteban e yôb, 15 nde nyô ase a buni nye, a mbili ényíñ ya nnôm éto.

16 Amu nalé Zambe a nga nye'e si nyô, vôm a nga ve atyí'i Mone dé, ane môt ase a buni nye a ye bo te jañ, ve a mbili ényíñe ya nnôm éto. 17 Amu Zambe a nji lôme Mone wé e si nyô na a ve si mekua, ve na si nyô é nyiban amu nye. 18 Môt a buni nye a ne te veban mekua, ve nyô a ne te buni nye a vebaneya mekua, amu a nga bo te buni jôé Atyí'i Mone Zambe. 19 Wuna ô ne ntyí'an ajô ete, amu éfufub é nga zu si nyô, ane bôt be nga dañe nye'e dibi a sa éfufub, amu mimboane miab mi mbe abé. 20 Amu môt ase a bo mbia be mam, a siñ éfufub, a nji zu bebé a éfufub. 21 Ve nyô a bo benya mejôd nnye a zu e éfufub, nalé mimboane mié mi a ye litibane na, mi nga boban e be Zambe.

Yésus Baa Yôhanes Baptist

22 Mvus éte, Yésus a nga ke ba be beye'é bé e si ya Yudéa ; ane a nga tabe wôé ba be be, a baptizô bôt. 23 Yôhanes fe a bo'ô bôt mbaptizô e Enon, bebé Salim, Amu mendim abui me mbe wôé. Nde bôt be nga bo be kele'e a baptizôban, 24 amu éyoñ éte Yôhanes a ngenan te ke mimbôk. 25 Nde môman me nga bo e zañe beye'é be Yôhanes a mone Beyude ajô ntunan. 26 Ane be nga ke e be Yôhanes, a jô nye na, A Rabbi, môt mia nye mi nga too e Yourdan yat , nyô ô nga kañete ajô dé, ô lôô, a baptizô bôt, a bôtet bese b'ake e be nye. 27 Yôhanes a nga yalan, a jô na, Môt a vo'ô nyoñe jôm éziñ, nga ve é vebane nye é so'ô yôb. 28 Miabebien mi ne bengaa ane me nga jô na, Me me nji bo Krist, ve na me ne nlôman ôsu vié. 29 Môt a bili mbom nnye a ne nlu'u minga, ve mvôé, nlu'u minga, é tele, é wô'ô nye, j'ava'a beta mva'an amu tyiñ nlu'u minga. Ajô ete, ava'a dame di e nto njalan. 30 Nnye a yiane nenenen, ve ma m'ayiane wulawulan.

Môt a so e yôb

31 Ntô a so e yôb, nnye a dañe bese. Nyô a so e si nyô a ne nyô ya si nyô, a kobô fe mfa'a ya si nyô. Nyô a so e yôb, (nnye a dañe bese). 32 Jam a maneya yen a wôk, nde ete a kañete a teke'e môt a kañese nkañetane wé. 33 Môt a kañese nkañetane wé, nnye a saneya na, Zambe a ne bebela, 34 amu môt Zambe a nga lôm, a kobô mejô me Zambe, amu Zambe a ve nye Nsisim te vek. 35 Esa a nye'e Mon, nde a veyá nye mam mese e mo. 36 Môt a buni Mon, a mbili ényíñ ya nnôm éto ; nde nyô a bene buni mon, a ye ke yen ényíñ, ve ayaa Zambe e too e be nye.

Yésus baa minga ya Samaria

4 1 Ajô ete, éyoñ Nti a nga yeme na, Befarésias be wô'ô ya na, Yésus a bo beye'é abui, a baptizô fe adañe Yôhanes

2 —akôsabo Yésus émien a nji baptizô, ve beye'é bé, — 3 ane a nga kôlô e Yudéa, a beta ke mfa'a ya Galiléa. 4 Nde a nga yiane tulan Samaria. 5 Ajô ete nde a nga kui nlam éziñ ya Samaria, b'aloene na, Sikar, bebé éfuse si Yakob a nga ve Yôsef mone wé ; 6 anjeñe Yakob e mbe vôme ate. Ajô ete Yésus, amu a ju'uya dulu, a nga tabe de nalé anjeñe yôb ;awolo été e mbe bebé abe zañe môs.

7 Minga ya Samaria a nga zu labe mendim. Yésus a nga jô nye na, Nyu'u me mendim ; 8 amu beye'é bé be keya e nlam na be kuse bidi. 9 Ajô te minga ya Samaria a nga jô nye na, A nto aya, wo mone Beyude, w'aja'é me minga ya Samaria mendim ? (amu Beyude ba be bôt ya Samaria be ne te fulane mam). 10 Yésus a na yalan a jô nye na, , Nge ô too yeme mveane Zambe, a yeme fe môt a jô wo na, Nyu'u me mendim, ve w'ate ye ja'é nye, nnye ke a te ye ve wo bevevee mendim. 11 Minga a nga jô nye na, A Nti, ô nji bi élabá'a, anjeñe ke édo'o si. Ajô ete bevevee mendim ô bili b'aso vé ? 12 Ye w'adañ ésa wongan Yacob, nnye a nga ve bia anjeñe di, émien a nga nyu fe de, a bone bé, a biyeme bié ? 13 Yésus a nga yalan, a jô nye na, Môt ase a nyu mendime ma, a ye beta wô'ô évé. 14 Ve nyô a ye nyu mendim m'aye ve nye, a ye ke wô'ô évé, akekui nnôm éto, ve mendim m'aye ve nye m'aye bo nye anjeñe mendim e nlem été, me kuik ényíñ ya nnôm éto. 15 Minga a ngajô nye na, A Nti va'a me mendime mete, me bo te wô'ô évé, nge beta zu kui nné, a labe mendim.

16 A nga jô nye na, Kele loene nyô nnôm, ô zu nne. 17 Minga a nga yalan a jô nye na, Me nji bi nnôm. Yésus a nga jô nye na, O jôya mvaé na, Me nji bi nnôm ; 18 amu ô biya beyôm betan, a nyô ô bili éyoñe ji a nji bo nyo nnôm. Jam w'akobô di é ne bebela. 19 Minga a nga jô nye na, A Nti, me lôô na, ô ne nkulumejô. 20 Betate be nga kañ e nkôle wu, ve mia mi ajô na, E Yéusalem nnye a ne vôm môt a yiane kañ. 21 Yésus a nga jô nye na, A minga, buni'i ma, awolo d'azu, éyoñ mi a ye kañ Esa, sa e nkôle wu, nge e Yéusalem. 22 Mia mi akañe jôm mi ne te yem, ve bia bi akañe jôm bi ayem, amu nnyian w'aso e be Beyude. 23 Ve awolo d'azu, e nto fe éyoñe ji, éyoñ benya bekañe b'aye kañ Esa a nsisim a benya mejôô. 24 Minga a nga jô nye na, M'ayeme na, Mésias a ye zu, nnye b'aloene Krist. Eyoñ émien a soya, a ye kate bia mam mesese'e. 25 Yésus a nga jô nye na, Me ate nyô m'akobô wo.

26 Eyoñ éte ébien beye'é e nga so, be nga semé, amu a nga too a kobô'ô minga. Ve akôsabo nalé, teke'e môt a nga jô na, W'ajeñe jé ? nge na W'akobô nye amu jé ? 27 Ajô ete minga a nga lí'i nka'a mendim wé a ke e nlam, a jô bôte na, 28 Za'a yenane môt a t kate me mam mese me nga bo. Ye nye ane bo Krist ? 29 Ane be nga kôlô e nlam, be nga ke e be nye.

31 Zañ éte nje beye'é be nga ye'elane nye na. A Rabbi, tame di. 32 Nde a nga jô be na, Me bili bidi ya di, mmbie mi ne te yem. 33 Ajô ete beye'é be nga ke b'ajôane na, Ye môť éziñ a zuya ve ye jôm ya di ? 34 Yésus a nga jô be na, Bidi biam bi ne na, me bo nkômban ya nyô a nga lôme ma, me sondô fe ésaé jé. 35 Ye mi nji jô na, ngon ényin é ngenan, wôna mvaane bidi w'aye bo ? Mi lôô, m'ajô mia na, Beta'ane mis, mi lôbô mefub ! Me nto ne fum ane be ne vaa bidi ya été ayab. 36 Môť a vaa bidi a nyoñe ma'an, a kôane fe bibuma akui ényin ya nnôm éto, nde ete môť a mias a nyô a vaa bidi b'avak mfula'ane. 37 Amu ajô ete nde njôan ô ne bebela na, Môťe wua a ne mmias, a môť mfe a ne mvaa bidi. 38 Ma me nga lôme mia mi vaa bidi mi nji ju'u ésaé ya été. Bôťe befe be ju'uya ésaé éte, , a mia mi nga fubu nju'u ésaé wob été.

39 Nde mfa'a ya nlam ôte, abui bôťe ya Samaria be nga buni nye amu mejô me minga a nga kañete be, a jô na, A te kate me mam mese me nga bo. 40 Ajô ete, bôťe ya Samaria be nga zu e be nye, be nga ye'elane nye na, a tabe e be be. Ane a nga tabe e be be melu mebaé. 41 Ane bôťe befe abui be nga buni amu mejô mé ; 42 ane be nga jô minga na, Bi nji fe buni amu nkobô wôé ; amu biabebien bi wô'ôya, bi yeme fe bebela na, nyina a ne Nnyi bôťô ya si nyô.

Nsaéane Mon Evet Njô Bôt

(Mat 8 : 5-13 ; Luk 7 : 1-10)

43 Melu mete mebaé me lôteya, ane a nga kôlô vôm ate a ke e Galiléa ; 44 Amu Yésus émien a nga kañete, a jô na, Nkulumejô a nji bi ésemen e si jé émien. 45 Ajô ete éyoñ a nga kui e Galiléa, bôťe ya Galiléa be nga nyoñe nye, amu be nga yene mam mese, abim a ne a nga bo e Yérusalem, melu ya ébek, amu be fe be mbe ébe'e éte.

46 Ajô ete a nga beta kui e Kana ya Galiléa, vôm a nga kôñelane mendime wain. Nde évet njô bôt é nga too e Kapernahum, mona fame wé a nga kon. 47 Môť ate éyoñ a nga wô'ô na, Yésus a soya e Yudéa, a nto e Galiléa, a nga ke e be nye, a ye'elane nye na, a sis, a ke saé nye mon ; amu a mbeme wu. 48 Ajô ete Yésus a nga jô nye na, Nge mi nji yene mendem a bitua bi mam, mi ne te buni. 49 Evet njô bôt é nga jô nye na, A Nti, Sisik, nté mone wom a ngenan te wu ! 50 Yésus a nga jô nye na, Kele w'ake, nyô mon a nyiñeya. Môť ate a nga buni mejô Yésus a nga jô nye, ane a nga ke. 51 Nde éyoñ a ngenan a siliki'i, bebobisaé bé be nga tôbane nye, be na Mone wé a nyiñeya. 52 Ajô ete, a nga sili be awolo a nga taté bo mvo'é. Nde be nga jô nye na, Angô'é awolo da, nde ayôñ e nga mane nye nyô. 53 Ajô ete, ésa a nga yemelane na, awolo ete ébien nde Yésus a nga jô nye na, Nyo mon a nyiñeya, ane a nga buni, émien a nda jé ése. 54 Nde nyina é ne ndeme baa Yésus a nga bo, éyoñ éte a kôlôya e Yudéa, a kui e Galiléa.

Nsaébane Môť Ya Etok

5 1 Mvus éte ébe'e Beyude é nga bo, ane Yésus a nga bet e Yérusalem. 2 A nde étok é ne e Yérusalem, bebé mbé aka'a mintômba, b'aloene je nkobô Hébru na, Betesda, é bili biyas menda bitan. 3 Vôm ate ézu'u minkôkon é nga bôô : mindindim, mimbôbôk a miñyeyem, [mi mombô'ô mfô'ôsane mendim. 4 Amu éngel ya be Nti a nga bo a sisik mingum biyoñ éto'o été, a fôkô'ô mendim ; ajô été mô't a nga tate tebe été éyoñ mendim m'akumutu, nnye ate a nga saéban, aval ôkon ese a nga bili]. 5 Nde mô't éziñ a mbe wôé, a too nkôkon ya mimbu mewôm mela a muam. 6 Eyoñ Yésus a nga yene nye a bôô, a yeme fe na, a tabeya nalé ayab, a nga jô nye na, Ye w'akômbô saéban ? Nkôkon ôte ô nga yalane nye na, A Nti me nji bi mô't éziñ a ne wua me étok, éyoñ mendim m'akumutu ; nté me ngenan me kelek, mô't mfe a viane sise me ôsu. 8 Yésus a nga jô nye na, Kôlô'ô si, . Toké'é ôkala viôé, ô wulu. 9 Nde été été, mô't a nga bo mvo'é, a to'é fe ôkala vié, a wulu.

Môs ôte ô mbe sabbat. 10 Ajô été, Beyude be nga jô mô't a nga saébane na, A ne sabbat, nde e ne wo étyi ya to'é ôkala viôé. 11 Ve a nga yalane be na, Mô't a te bo me mvo'é, nnye a te jô me na, Toké'é ôkale viôé, ô wulu. 12 Be nga sili nye na, Za a ne mô't a te jô wo na, Toké'é ôkala viôé ô wulu ? 13 Ve mô't a nga saéban a nji yeme mô't ate, amu Yésus a nga wondé vôm ékôane bôt é nga too. 14 Mvus éte Yésus a nga koé nye e tempel été, ane a nga jô nye na, O lôô, ô nto mvo'é ; te beta bo abé, jam d'adañ abé é za bo wo. 15 Mô't ate a nga kôlô, a kate Beyude na, Yésus, nnye ate bo nye mvo'é. 16 Amu ajô ete Beyude be nga kpwe'ele Yésus, amu a nga bo mam ma e môse sabbat. 17 Ve Yésus a nga yalane be na, Esa wom a bo ésaé azukui éyoñe ji, nalé ma fe m'abo. 18 Amu ajô ete Beyude be nga dañe jeñe na, be wôé nye, sa amu a nga tyame môse sabbat étam, ve amu a nga jô na Zambe a ne Esa wé ; nalé a nga bo émien baa Zambe nté wua.

Ngulenjôane Mon

19 Ajô ete Yésus a nga yalan, a jô na, M'abele fo'o ane m'ajô mia na, Mon a vo'o ke bo jam éziñ a émien, teke'e na a yen Esa a bo'ok. Amu mam mese Esa a bo, mme fe Mon a bo. 20 Amu Esa a nye'e Mon, a liti fe nye mam mese émien a bo ; a ye fe liti nye mimbôan mi adañe mina, ane mi aye semé. 21 Amu aval ane Esa a wômôlô miñwuan a bo mie bevevee, aval ete fe Mon a bo ba a kômbô, bevevee. 22 Amu Esa a nji tyi'i ajô mô't, ve a nga ve Mon ntyi'iane mejô ôse, 23 nde ete bôte bese b'aye ve Mon ésemen avale fe ane b'ave Esa. Mô't a bo te ve Mon ésemen ; a ne te ve Esa a nga ôme nye, ésemen. 24 M'abele fo'o ane m'ajô mia na, Mô't a wô'ô mejô mam, a buni fe nyô a nga lôme ma, nnye a bili ényañ nnôm éto, a nji zu vôm ya ntyi'ane mejô, ve akôlôya awu akui ényañ. 25 M'abele fo'o ane m'ajô mia na, awolo d'azu, nde e ne fe éyoñe ji, éyoñ miñwuan mi aye wô'ô tyiñe Mone Zambe, nde b'a be wô'ô ya je b'aye nyañ. 26 Amu aval ane Esa a bili ényañ be émien, aval ete fe a nga bo na Mon a bi ényañ e be émien. 27 A nga ve fe

nye ngulenjôan ya ntyi'ane mejô, amu a ne Mone mô. 28 Te semen ajô di, amu awolo d'azu, nde ba bese be ne mesofi b'aye wô'ô tyiñe jé, b'aye kui atan ; 29 ba be nga bo mbamba be mam, b'aye kui miñwômane miñwuan ô ne ényíñ, a ba be nga bo mbia be mam b'aye kui miñwômane miñwuan ô ne ntyi'ane mejô.

Bengaa B'akañete Ajô Yésus

30 Me me vo'o ke bo jam éziñ a mamien ; aval ane m'awôk, nde m'atyik, a ntyi'ane wom ô ne zôsô, amu me ne te jeñe nkômbane wom mamien, ve nkômbane ya nyô a nga lôme ma. 31 Nge ma m'akañete ajô dam, nkañetane wom ô se ke bebela.

32 Môt mfe nye a kañete ajô dam, a m'ayeme na, nkañetane a kañete ajô dam ô ne bebela. 33 Mia mi nga lôme bôt e be Yôhanes, nye fe a nga kañete mfa'a benya mejô. 34 Me ne te nyoñe nkañetan e be bôt, ve m'ajô mam ma ane mi aye nyiiban. 35 Ambe lambe, a yôñôk a faék, a mi nga kômbô na mi vak éfufube jé été nté éziñ. 36 Ve ma me bili nkañetan w'adañe wu Yôhanes ; amu miboane Esa wom a vey a me na, me sondô bo, mimboan mite mibien m'abo, mi akañete ajô dame na, Esa wom a nga lôme ma. 37 Nalé fe mô a nga lôme ma, nnye a ne Esa a kañete ajô dam. Mi nji tame wô'ô tyiñe jé, nge yen éyeka'a jé, 38 nalé fe mi nji bi mejô mé me too e be mia, amu mi ne te buni mô émien a nga lôm. 39 Mi abi'i mintilan, amu mi asimesane na, amu mie mi aye yen ényíñ ya nnôm éto, mintilan mite mi akañete ajô ; 40 ve mi nji kômbô zu e be ma na mi yen ényíñ.

41 Me nji nyoñe дума d'aso e be bôt ; 42 ve me nga yeme mia na, nye'ane Zambe ô nji bo e be mia. 43 Ma me nga zu a jôé Esa wom, ve mia teke'e nyoñe ma ; nge mô mfe a zu a jô dé émien, nnye ate mi aye nyoñ . 44 Mia, mi ne ngul ya buni aya, vôm mi anyoñane дума, bana e be ba bevok, ve дума d'aso e be Zambe étam mi ne te jeñe de ? 45 Mi bo'o te simesane na, ma m'aye bo'olô mia e be Esa wom. Mô a bo'olô mia a ne , nnye a ne Môze, nyô mi too nye ndi. 46 Amu nge mi too buni Môze, ve mi buniya fe ma ; amu Môze ate nnye a nga tili ajô dam. 47 Ve nge mi ne te buni mintilane mié, mi aye buni minjôane miam aya ?

Mveane Bôt Toyini Etan Bidi

(Mat 14 : 13-21 ; Mark 6 : 30-44 ; Luk 9 : 10-17)

Rev. Matthias MEYE

Secrétaire Général 1961.....

6 1 Mvus éte Yésus a nga kôlô a dañe Mañ ya Galiléa yat mme me ne mañ ya Tibéria. 2 Nde, abui jama bôt a nga tôñe nye, amu be nga yene mendem a nga bo minkôkon. 3 Ane Yésus a nga bet e nkôl, a tabe si wé ba beye'é bé. 4

Paska, ébe'e Beyude, é mbe bebé. 5 Ajô ete, éyoñ Yésus a nga bete mis, a yene jama bôt a za'a vôm a nga too, a nga jô Filip na, Nne bi aye kuse fembé vé, ane bôte bana b'aye di ? 6 Ve a nga jô jam ete, a ve'ele nye, amu émien a yeme jam a ye bo. 7 Filip a nga yalane nye na, Abime fembé tañe denié mintete mibaé e ne te yiane be, ane mô't ase a ne nyoñe mone jôm. 8 Mô'te wua ya beye'é, Andréas, monyaña Simôn Pétrus, a nga jô nye na, 9 Oyôme mongô ô ne va, ô bili fembé org étan a kos ébaé ; ve biôm bina bi ne jé, bôt ke abui ana ? 10 Yésus a nga jô na, Tô'ane bôt e si. Bilo'o abui bi mbe vôm ate. Nalé ate befam be nga tabe si tañ ane toyini étan. 11 Ajô ete Yésus a nga nyoñe fembé éte, nde éyoñ a nga mane ve ve akéva, a nga kabe je e be bôt be nga too si, aval été fe kos, abim ane be nga kômbô. 12 Nde éyoñ be nga jaé, a nga jô beye'é bé na, Kô'an afufus e nga buk, jôm te wu ntuk. 13 Nalé be nga kôane de, a jalé bikat awôm a bibaé ya afufuse fembé org étan é nga buk éyoñe bôt be nga mane di. 14 Ajô ete, éyoñ bôt be nga yene ndem a nga bo, be nga jô na, Bebel na, nyina a ne nkulumejô, nyô a yiane zu e si nyô.

15 Ajô ete, éyoñe Yésus a nga yeme na, b'azu bi nye na, be telé nye njô bôt, ane a nga beta solan, a ke e nkôm émien étam.

Dulu Ya Mañe Yôb

(Mat 14 : 22-27 ; Mark 6 : 45-52)

16 Nde éyoñ ngô'é é nga bo, beye'é be nga sis mfa'a ya mañ. 17 Eyoñ be nga dañ éfunga été, be nga ke e mañe yat, akui Kapernaum. Eyoé éte fe dibi e nto, a Yésus a ngenane te kui e be be ; 18 Nalé fe mañ me nga bo ayok, amu beta évuñulu a nga vuñ. 19 Ajô ete, éyoñ be fuluya éfunga kilômita étan nge ésaman, , be nga yene Yésus a wulu'u e mañe yôb, a za'a bebé éfunga ; ane be nga ko woñ. 20 Nde a nga jô be na, Me le ! Te koane woñ. 21 Ajô ete, be nga kômbô nyoñe nye éfunga été ; a été été éfunga é nto kindik mfa'a be nga ke.

Yésus Fembé Ya Enyiñ

22 Tyé kpwa, ékôane bôt é ngenan é tele éteb e mañe yat, éyoñ be nga yene na, mon éfunga mfe a nji bo wôé, ve jia étam, a na, Yésus a nga bo te dañ nya éfunga été ba be beye'é bé, ve beye'é étam be nga kôlô, 23 bone bifunga befe be nga so e Tibéria, bebé vôm be nga di fembé [éyoñ Nti a nga ve akéva] ; 24 ajô ete éyoñ ékôane bôt é nga yene na, Yésus a nji bo wôé, to'ana beye'é bé, bebien be nga dañ bone bifunga bete été, a ke e Kapernaum, be kele b'ajeñe Yésus. 25 Nde éyoñ be nga koé nye e mañe yat, be nga jô nye na, A Rabbi, w'ate zu nne éyoñ évé ? Yésus a nga yalane be, a jô na, M'abele fo'o ane m'ajô mia na, Mi ajeñe ma, sa amu mi nga yene mendem, ve amu mi nga di

fembé éte a jaé. 27 Te boan ésaé ajô bidi bi awu ntuk, ve bidi bi atabe akekui ényíñ ya nnôm éto, mbie Mone Môt a ye ve mia, amu nnye Zambe Esa a saneya. 28 Ajô ete, be nga jô nye na, bi ayiane bo jé ane bi aye bo bisaé bi Zambe ? 29 Yésus a nga yalan, a jô be na, Jina nje é ne ésaé Zambe na, mi buni môť émien a nga lôm. 30 Ajô ete be nga jô nye na, Nde jé w'abo ane ndem, bi yen a buni wo ? W'abo za avale mendeme ? 31 Betate be nga di manna e nkôte si, aval ane e ne ntilane na, A nga ve be fembé é so'ô yôb, be di. 32 Ajô ete Yésus a nga jô be na, M'abele fo'ô ane m'ajô mia na, Sa Môze nnye a nga ve mia fembé é so'ô e yôb, ve Esa wom a ve mia fembé j'aso e yôb, nje é ne nye fembéé.

33 Amu fembé Zambe é ne nyô j'asis, a ve si nyô ényíñ. 34 Ajô eet be nga jô nye na, A Nti va'a bia fembé nyô kom ése. 35 Yésus a nga jô be na, Ma me ne fembé ya ényíñ : môť a zu e be ma, a ye wô'ô zaé a nyô a buni ma, a ye ke wô'ô évé, ne tya. 36 Ve m'ate jô mia na, Mi yeneya, ve mi ne te buni. 37 Môť ase Esa wom a ve ma a ye zu e be ma ; a nyô a zu e be ma, m'aye ke wua nye atan, 38 amu me nga sis me so'ô yôb, sa na me bo nkômbane wom, ve nkômbane ya nyô a nga lôme ma. 39 Nde wuna ô ne nkômban ya nyô a nga lôme ma, na, nyô ase a veyá ma, m'aye bo te dimili wua ya été, ve m'aye wômôlô nye e môs w'asu'ulan. 40 Amu wuna ô ne nkômban Esa wom na, môť ase a yene Mon, a buni fe nye, a mbili ényíñ ya nnôm éto ; a m'aye wômôlô nye e môs w'asu'ulan.

41 Ajô ete, Beyude be nga kobô menyíñ ajô dé amu a nga jô na, Ma me ne fembé é nga sis é so'ô yôb. 42 Ane be nga jô na, Ye sa Yésus mone Yôsef nyô, biabebien bi ayem ésa baa nyia ? Amu jé a jô éyoñe jina na, Me nga sis, me so'ô yôb ? 43 Yésus a nga yalan a jô be na, Te mi akobane menyíñ aval ete ! 44 Teke'e môť a ne ngul ya zu e be ma, nga ve Esa a nga lôme ma a dutu nye ; nnye fe m'aye wômôlô e môs w'asu'ulan. 45 E ne ntilan e kalata nkulumejô na, Bese b'aye ye'é e be Zambe. Môť ase a nga wô'ô Esa a ye'é, nnye a zu e be ma. 46 Me nji jô na, môť éziñ a nga yen Esa, nga ve nyô a so e be Esa ; nnye ate a yen Esa. 47 M'abele fo'ô ane m'jô mia na, Môť a buni, nnye a bili ényíñ ya nnôm éto. 48 Ma me ne fembé ya ényíñ. 49 Beéso benan be nga di manna e nkôte si, a be nga wu. 50 Nyina é ne fembé j'asis , é so'ô yôb, nde môť a di je, te fe wu. 51 Ma me ne vevea fembé a nga sis, a so'ô yôb. Nge môť a di fembé nyô, a ye tabe ényíñ ya nnôm éto ; nde fembé éte mamien m'aye ve mfa'a ya si nyô ényíñ nje é ne minsône miam.

52 Ajô eet Beyude bebieb bebien be nga luman, be jô'ô na, Môť nyô a ne ngul ya ve bia minsône mié bi di mie , aya ? 53 Ajô ete Yésus a nga jô be na, M'abele fo'ô ane m'ajô mia na, Mi nji bi ényíñ e be miabebien, vengevenge ve mi adi minsôn mi Mone môť a nyu metyi mé. 54 Môť a di minsône miam, a nyu metyi mam, nnye a mbili ényíñ ya nnôm éto ; ma fe m'aye wômôlô nye e môs w'asu'ulan. 55 Amu minsône miam mi ne benya bidii, a metyi mam me ne nya jômô ya nyu. 55 Môť a di minsône miam, a nyu metyi mam, nnye a too e be ma, ma fe e be nye. 57 Aval ane vevea Esa a nga lôme ma, ma fe m'anyíñ amu Esa, nde môť a di ma, nnye fe a ye tabe ényíñ amu ma. 58 Nnyina é ne fembé é nga sis, é so'ô yôb, sa aval ane beéso benan be nga di, a be nga wu. Môť a di fembé nyô a ye tabe ényíñ ya nnôm éto. 59 A nga kobô mam ma e sinagôg été, éyoñ a nga ye'ele bôt e Kapernaum .

Mejô Ya Enyiñ Ya Nnôm Eto,

60 Ajô ete, éyoñ bôt abui ya beye'é bé be nga wô'ô jam ete, be nga jô na, Njôane wu ô ne ayet. Za a ne ngul ya vô'ôlô wô ? 61 Ve éyoñ Yésus a nga yem e nlem été na, beye'é bé b'akobô jame di menyiñ, a nga jô be na, Ye jame di d'akolé mia ôbak ? 62 Nde jé fe nge mi yene Mone mô't a kele e vô'm a nga to ôsusua ? 63 Nsimim ñwô w'ave ényiñ, minsôn mi ne teke'e volô jôm. Mejô me jôya mia, me ne nsimim, a me ne fe ényiñ. 64 Ve bevo'o ya be mia be ne te buni. Amu aso atata'a Yésus a nga yem ba be ne te buni, a mô't a ye koñe nye. 65 Ane a nga jô be na, Amu ajô ete nde m'ate jô mia na, Teke'e mô't a ne ngul ya zu e be ma, te na, Esa wom a ve nye ngul éte.

66 Jam ete nde beye'é abui be nga timane nye de mvus, te fe beta wulu nsamba wé. 67 Ajô ete Yésus a nga jô bôt awôm a bebaé na, Ye mia fe mi akômbô kôlô ? 68 Simôn Pétrus a nga yalane na, A Nti bi aye ke e be za ? Wo ô bili mejô ya ényiñ ya nnôm éto. 69 Bia bi buniya, a bi yemeya fe na, wo ô ne Mfufube ya Zambe. 70 Yésus a nga yalane be na, Ye mamien me nji tobe mia bôt awôm a bebaé, a mô'te wua ya be mia a ne diable. 71 A nga jô jam ete ajô Yudas , mone Simôn Iskariôt ; amu nye a ye koñe nye, a to fe mô'te wua ya bôt awôm a bebaé.

Bobenyañ Be Yésus be be te Buni

7 1 Mvus éte Yésus a nga ke a wulu e Galiléa, amu a nga bo te kômbô wulu e Yudéa, amu Beyude be nga jeñe na, be wô'e nye. 2 Ve ébe'e Beyude, ji Bibem, é mbe bebé. 3 Ajô ete, bobenyañ bé be nga jô nye na, Kôlô'ô vô'me nyô, ô ke e Yudéa, ane beye'é bôe fe be ne yen mimboan w'abo. 4 Amu na, teke'emô't a bo jam asoé, éyoñ émien a jeñe na, a yené e be bôt. Nge w'abo mam ma, liti'i si nyô womien. 5 Amu ja'ana bobenyañe bé be nji buni nye. 6 Ajô ete Yésus a nga jô be na , Eyoñe jam é ngena te kpwaan ; ve éyoñe jenan é ne nkôman kom ése. 7 Si nyô é vo'o siñe mia ; ve ma j'asiñ, amu mamien m'akañete ajô dé na, mimboane mié mi ne abé. 8 Betan, mi ke ébek. Mamien me nji bet a ke ébe'e ji, amu éyoñe jam é ngenan te kpwaan. 9 Nde éyoñ a nga mane kobô mejô mete, a nga langan a too e Galiléa.

Yésus A Ne Ebe'e Bibem

Rev. Matthias MEYE
Secrétaire Général 1961.....

10 Nde éyoñ bobenyañ bé be nga mane bet ébek, éyoñ éte émiene fe a nga bet, sa éngengeñ, ve ane asoé. 11 Ajô ete Beyude be nga jeñe nye ébe'e été, be jô'ô na, Môt ate a ne vé ? 12 Ane menyíñ me nga bo abui ajô dé e ékôane zañ. Ba bevo'o be nga jô na, A ne mbamba mô. Bevo'o na, Sa nalé, ve a yale ékôane bôt zene fe. 13 Ve akôsabo nalé, teke'e mô a nga kobô ajô dé ne ngeeñ, amu be nga ko Beyude woñ.

14 Nde éyoñ ébe'e é nto ézezañ, Yésus a nga bet, a nyin e Tempel été, a ye'ele. 15 Ajô ete Beyude be nga semé, be na, Môt nyô a kôme yeme mintilan aya, teke'e na a nga ye'é ? 16 Ajô ete Yésus a nga yalane a jô be na, Nye'elan m'aye'ele ô njo bo éñwom, ve wu mô a nga lôme ma. 17 Nde mô éziñ a kômbô bo nkômbane wé, éyoñ éte a ye yem mfa'a ya ñye'elan ôte, nge w'aso e be Zambe, nge m'akobô wô amu mamien. 18 Mô a kobô amu émien, nnye ate a jeñe дума dé émien. Ve mô a jeñe дума ya nyô a nga lôme nye, nnye a ne bebela, a ékotekot é nji bo e be nye. 19 Ke Môze a nga ve mia metiñ, a teke'e mô wua ya be mia a ba'ale metiñ mete. Amu jé mi ajeñ na mi wôé ma ? 20 Ekôane bôt é nga yalane na, O bili mbia nsisim. Za a jeñe na, a wôé wo ? 21 Yésus a nga yalan a jô be na, Me nga bo mboane wua, a mia bese ma asemé wô. 22 Amu ajô ete nde Môze a ga ve mia ntyi'ane atyel, amu w'aso ke e be Môze, ve e be betate ; nde ja'ana môse sabbat mi atyi'i mô atye. 23 Nde mô a tyi'iban atyel e môse sabbat, ane metiñ me Môze m'aye bo te tyamban, ye mi awô'ô abé ajô dam, vôm me nga bo ngume mô mvo'é e môse sabbat ? 24 Te tyi'ane mejô amu ñyenan, ve mi tyi'ane me zôsôa ntyi'an.

Ye Nyina A Ne Krist

25 Ajô ete, bôte bevo'o ya Yéroualem be nga jô na, Ye sa môte b'ajeñe na, be wôé, nnye nyô ? 26 Mi lôô, a kobô ne ngeeñ, a be ne te jô nye jam éziñ. Ye bivet bi ayem bebela na, Môt nyina a ne Krist ? 27 Mfa'a ya mô nyô, bi ayeme vôm a so ; ve mfa'a Krist, éyoñ a ye so, teke'e mô a ye yeme vôm a so. 28 Ajô te Yésus a nga yôtan éyoñ a nga ye'ele bôt e tempel été, a jô na, Mi ayeme ma, a mi ayeme fe vôm me nga so, ve me nji so amu mamiene e be mô a nga lôme ma a ne bebela, nnye ate mi ne te yem. 29 Me m'ayeme nye, amu na, m'aso e be nye, nnye ate fe a nga lôme ma. 30 Ajô ete be nga kômbô jeñe na, be bi nye, ve teke'e mô a nga futi nye mo e nyô, amu awolo dé é nganan te kpwaan. 31 Ve mfa'a ya ékôane bôt, abui ya été e nga buni nye, ane be nga jô na, Eyoñ Krist a ye so, ye a ye bo mendem m'adañe ma mô nyô a boya ?

Bekeminlôman B'ake Bi Yésus

Rev. Matthias MEYE
Secrétaire Général 1961.....

32 Befarésias be nga wô »ô ane ékôane bôt j'akobô mam mete e menyîñ ajô dé. Ane minlô bepretre a Befarésias be nga lôme bekeminlômane na, be bi nye. 33 Ajô ete Yésus a nga jô na, Me ngenan me too mone nté bia be mia, wôna m'aye ke e be nyô a nga lôme ma. 34 Mi aye jeñe ma, a mi aye bo te yen, a vôm me too, mia mi vo'o kui wôé. 35 Ajô ete Beyude be nga jô bebien bebien na, Môt nyô a zu ke mfa'a mbé, ane bi aye bo te yene nye ? Ye a zu ke e be ba be nga mane mialan e mesi Begrek, a ye'ele Begrek ? 36 Z aka'a éfia a te jô dina na, Mi aye jeñe ma, a mi aye bo te yen ; a na, vôm me too, mia mi vo'o kui wôé ?

Asôé Bevevee Mendim

37 Nde môs ô nga su'ulan, beta môs ya ébek, Yésus a nga tele wôé, a yôta'an a jô na, Nge môt éziñ a wô'ô évé, a za'a e be ma, a nyu. 38 Môt a buni ma, ane ntilan w'ajô na, asôé e so'o nye abum, d'aye kuli bevevee mendim. 39 Ve a nga jô ajô di mfa'a ya Nsisim, ñwô bôt b'abuni nye b'aye nyoñ ; amu Nsisim ô ngenan te bo ñwumulan.

Nkandan E Zañe Bôt

40 Ajô ete, éyoñ bevo'o ya ékôane bôt be nga wô'ô mejô ma, be nga jô na, Nyina a ne bebela nkujlumejô. 41 Bevo'o be nga jô na, Nyina a ne Krist. Ve ba bevok na, Ye Krist a ne so e Galiléa ? 42 Ye mintilan mi nji jô na, A ye so e mvoñe bôt David, a so'o e Bethléhem, jale David a nga too ? 42 Ajô ete ékôane bôt é nga kandane zañ amu ajô dé. 44 Bevo'o ya été be nga kômbô bi nye, vee teke'e môt a nga futi nye mo e nyô.

Bôt Ya Ejôé Be Nji Buni Yésus

45 Ajô ete bekeminlôman be nga bulan e be minlô bepretre a Befarésias ; ane be nga jô be na, Amu jé mi ate bo te zu nye ? 46 Bekeminlôman be nga yalane na, Teke'e môt a kobô mam aval ane môt ate. 47 Ajôete, Befarésias be nga yalane be na, Ye be yaleya fe mia zene fe ? 48 Ye môt éziñ ya bivet, nge Befarésias, a buniya nye ? 48 Ve ékôane bôte ji é ne biyo'é, vôm é ne te yeme metiñ. 50 Nikôdémus, môt a nga taté zu be Yésus ôsusua, a too fe môte wua ya be be, a nga jô be na, 51 Ye metiñe menan m'atyi'i ajô môt, te tame taté wô'ô ane a kobô, a yeme fe jam a bo, 52 Be nga yalane nye na, Ye wo fe w'aso e Galiléa ? Tame fas a yeme na, nkulumejô a nji tebe a so'o Galiléa.

Minga A Nga Bili E Mejian

(Yôh 7 : 53 — 8 : 11)

8 [7 : 53 Ane be nga ke mỗt ase ya été e nda jé. 8 : 1 Ve Yésus a nga ke e nkỗle beỗlivié. 2 Nde ékuna tyé, a nga beta suan e tempel ; ane ékỗane bôt ése é nga ke be nye . Ane a nga tabe si, a ye'ele be. 3 Nde betitli bekalate a Befarésias be nga zuu minga, be nga bi nye a bo'ô mejian, ane be nga telé binga e bôte zañ, 4 be nga jô nye na, A Nye'ele, minga nyô a te bili, a bo'ô mejian. 5 Nde e metiñ été, Môze a nga bendé bia na, bi lum aka'a binga di mekok. Ajô ete, wo w'ajô aya ajô dé ? 6 Be nga jô jame di be ve'ele nye, ane b'aye bi éfia ya bo'olô nye . Ve Yésus a nga kumbu si, a tili tyia a ônyu. 7 Nde éyoñ be nga ke ôsu, ve sili, a nga nyokan, a jô be na, Mỗt ya be mia a ne te abé, nnye a taté'é lume nye akok. 8 Ane a nga beta kumbu si, a tili tyia a ônyu. 9 Nde éyoñ be nga wô'ô njôane ôte, be nga ke b'akỗlô wuwua wuwua, ataté bemvendé akui ba ya susu'a. Ane Yésus a nga li'i étam, nalé fe minga, a tele e bôt e zañ. 10 Ane Yésus a nga beta nyokan, a jô nye na, A minga, be ne vé ? Ye teke'e mỗt a veyo wo mekua ? 11 Nde a nga jô na, A Nti teke'e mỗt. Nde Yésus a nga jô na, Ja'ana ma, me ne te ve wo mekua, Kele'e w'ake ; akỗlô éyoñe ji, te beta bo abé.]

Yésus Efufub Ya Si Nyô

12 Ajôete Yésus a nga beta kobô be, a jô na, Ma me ne éfufub ya si nyô. Mỗt a tôñe ma, a ye ke wulu e dibi, ve a ye bi éfufub ya ényíñ . 13 Ajô ete Befarésias be nga jô nye na, W'akañete ajô dôé womien ; nkañetane wôé ô nji bo bebela. 14 Yésus a nga yalan a jô be na, Nde ja'aname m'akañete ajô dam mamien, ve nkañetane wom ô ne bebela, amu m'ayem mfa'a me nga so, nge mfa'a m'ake. 15 Mia mi atyi'i mejô ane minsôn. Mamien me ne te tyi'i ajô mỗt éziñ. 16 Ve ja'ana m'atyi'i mỗt ajô, ntyi'ane womô ne nya ntyi'ane, amu me se étam, ve me ne bia Tate a nga lôme ma. 17 Nalé fe na, e metiñ menan e ne ntilane na, Nkañetane bôte bebaé ô ne bebela. 18 Ma me ne mỗt a kañete ajô dam mamien, nalé fe Tate a nga lôme ma, a kañete ajô dam. 19 Ajô ete, be nga jô nye na, Eso a ne vé ? Yésus a nga yalane be na, Mi ne te yem, to ma, to Esa wom. 20 A nga kobô mejô mete, a too bébé vỗm éwolo akum é mbe, a ye'ele bôt e tempel été ; a teke'e mỗt a nga bi nye, amu awolo dé e ngenan te kpwaan.

Mfa'a M'ake, Mi Vo'ô Kui Wôé

21 Ajô ete, a nga beta jô be na, Ma m'akôlô, a mi aye jeñe ma, a mi aye wu abé denan été. Mfa'a m'ake, mia mi vo'o kui wôé. 22 Ajô ete Beyude be nga jô na, Ye a ne ke wôé émien, amu a jô na, Mfa'a m'ake, mia mi vo'o kui wôé. 23 Ane a nga jô be na, Mia mi ne ba b'aso e si ; ma me ne nyô a so e yôb. Mia mi ne bôte ya si nyô ; ma me nji bo môte ya si nyô. 24 Ajô ete be nga jô nye na, O ne za ? Yésus a nga jô be na, Ve jam me nga kobô fe mia ôsusua. 26 Me bili mam abui ajô denan, m'ayiane kobô a tyik. Ve mô t a nga lôme ma, a ne bebela ; mamiene fe mam me nga wô'ô a kobô'ô, mme mete m'akobô si nyô. 27 Be nga bo te yeme na, a kobô ajô Esa. 28 Ajô ete Yésus a nga jô na, Eyoñ mi aye bete Mone mô t e yôb, éyoñ éte mi aye yeme na, me ne nye, me ne teke'e bo jam amu mamien, ve aval ane Esa a nga ye'ele ma, aval ete m'akobô. 29 Nalé fe, mô t a nga lôme ma, a ne e be ma. A nji lí'i ma étam ; amu kom ése m'abo mam a yen mvaé. 30 Eyoñ a ngenan a kobô'ô mam ma, bôt abui be nga buni.

Benya Mejôô B'aye Bo Mia Beti

31 Ajô ete Yésus a nga jô Beyude be nga buni nye na, Nge mi abo mejô m'akobô, bebela na, mi ne beye'é bam ; 32 a mi aye yeme benya mejôô, a benya mejôô b'aye bo mia beti. 33 Be nga yalane nye na, Bi ne mvoñe bôt Abraham, a bi ngenan te tame bo belo be mô t éziñ. W'ajô aya na, Mi aye bo beti ? 34 Yésus a nga yalane be na, M'abele fo'o ane m'ajô mia na, Mô t ase a bo abé, nnye a ne ôlo ya abé. 35 Nde ôlo ô ne te tabe e nda été nnôm éto. 36 Ajô ete, nge mon a télé mia beti, mi aye fo'o bo beti. M'ayeme na, mi ne mvoñe bôt Abraham, ve mi ajeñe na, mi wôé ma, amu mejô mam me ne te tabe e be mia. 38 Mam mamien me nga yen e be Tate, mme mete m'akobô. Ajô ete, mia fe, mam mi nga wô'ô be éso, mme mi abo.

Eso Wônan A Ne Diable

39 Be nga yalan a jô nye na, Esa bi bili a ne Abraham. Yésus a nga jô be na, Nge mi ne bon be Abraham, ve mi abo mimboane mi Abraham. 40 Ve éyoñe ji, mi ajeñe na mi wôé ma, me mô t me kateya mia benya mejôô me nga wô'ô e be Zambe. Abraham a nga bo te bo jam ete. 41 Mia mi abo mimboane mi éso wônan. Be nga jô nye na, Bi nji bialé e mejian. Bi bili ésa wua ve Zambe. 42 Yésus a nga jô be na, Nge Zambe a to bo Eso wônan, ve mi nga ye nye'e ma ; amu mamien me na so e be Zambe, a me soya, ve sa amu mamien, ve nnye a nga lôme ma. 43 Mi ne te wô'ô nkobô m'akobô, amu jé ? Ve amu mi nji jibi vô'ôlô mejô m'ajô. 44 Mia mi ne bôte be diable, éso wônan, a mbia minkômbane mi éso wônan, mmie mi akômbô bo. Nnye ate a mbe ñwôé bôt aso atata'a, a ne fe tabee benya mejôô, amu na benya

mejôô be nji tabe e be nye . Eyoñ ése a kobô minsos, a kobô mam mé émien ; amu a ne nlaa minsos, a ésa ya été. 45 Ve amu m'akobô bebela, mi ne te buni ma. 46 Za ya be mia a kpwé ma mfa'a ya abé ? Nge m'akobô bebela, mi abo te buni ma, amu jé ? 47 Môt a so e be Zambe, nnye a wô'ô minjôane mi Zambe. Amu ajô ete nde mi ne te wô'ô mie, amu mi nji bo ba b'aso e be Zambe.

Te Yen Abraham A Za Bialé'é Me Too

48 Beyude be nga yalan a jô nye na, Ke bia bi ajô bebela na, ô ne mone Samaria, a na ô ne mbia nsisim, 49 Yésus a nga yalane na, Me me nji bi mbia nsisim, ve m'asémé Esa wom, ve mia mi abiasé ma.

50 Nde mamien me ne te jeñe дума dam. Môt a ne, nnye a jeñe de, a tyi'i fe de. 51 M'abele fo'o ane m'ajô mia na, Nge môô a ba'ala mejô me nga jô, a ye ke yen awu, akui nnôm éto. 52 Beyude be nga jô nye na, Eyoñe ji bi yemeya na, ô bili mbia nsisim. Abraham a nga wu, nalé fe bekulumejô, ve wo w'ajô na, Nge môô a ba'ale mejô me nga jô a ye ke tye'e awu, akui nnôm éto. 53 Ye w'adañ Esa wongan Abraham, nnye a nga wu ? a bekulumejô be nga wu. W'abo womien za aka'a môô ? 54 Yésus a nga yalane na, Nge m'awumulu mamien, дума dam e ne momo jam. Esa wom a ne môô a wumulu ma, nnye ate mi ajô na, A ne Zambe wongan ; 55 a mi ne te yeme nye ; ve ma m'ayeme nye. A nge m'jô na, Me ne te yeme nye, m'aye funane mia ane nlaa minsos. Ve m'ayeme nye, a m'aba'ale mejô mé. 56 Abraham éso wônan a nga fôn amu a ye yene môse wom ; ane a nga yene wô, a nga vak. 57 Ajô ete, Beyude be nga jô nye na, ô za bo'o mimbu mewôm metan, nde ye ô nga yen Abraham ? 58 Yésus a nga jô be na, Te na Abraham a za tabe'e, me me too. 59 Ajô ete, be nga to'é meko'o na be lume nye ; ve Yésus a nga sobô, a kôlô e tempel été.

Nsaéban Môô A Nga Bialé Ndim

9 1 Nde, éyoñ a nga lôô, a nga yene môô a nga bialé ndim aso abialé. 2 Ane beye'é bé be nga sili nye na, A Rabbi, za a nga bo abé, ye môô nyô, ye bebiaé bé, nde a nga bialé ndim ? 3 Yésus a nga yalane na, Sa môô nyô a nga bo abé,, sa ke bebiaé bé, ve amu mimboan mi Zambe mi aye litiban e be nye. 4 Bia bi ayiane bo bisaé bi môô a nga lôme ma, nté môs ô ngenan. Alu d'azu, éyoñ môô a ne te ngul ya bo ésaé. 5 Eyoñ ése ma too e si nyô, me ne éfufub ya si nyô. 6 Eyoñ a nga mane kobô mejô mete, a nga tui menden, a bo mbotok a mendem, a wo'o môô ate mbotô'o mis, 7 a jô nye na, Kele' sôbe mis éto'o ya Silôa (d'asu'ulane na, Nlôman). Ajô ete a nga ke, a sôb, a nga bulan, a yenek. 8 Ajô ete, bôt ba be nye be nga too, a ba be nga yene nye ôsusua, a too nzezak, be nga jô na, Ye sa môô a nga bo a tabe'e si, a jaké'é

biôm, nnye nyô, 9 Bevo'ô be nga jô na, Nnye le. Ba bevo'ô na, Momo, a funane nye. 10 Ajô ete, be nga jô nye na, Nde mise môé m'ate kuiban aya ? 11 Môt ate a nga yalane na, Môt b'aloene na, Yésus, nnye a nga bo mbotok a wo'ô me wô e mis, a jô me na, Kele' Silôa, ô sôbe mis. Ajô ete, éyoñ me nga ke me nga sôbane fe mis, me ve yen. 12 Ane be nga jô nye na, Môt ate a ne vé ? Nye na, me nji yem.

Befarésias B'afas Ajô Nsaéban

13 Be nga zuu môt a nga too ndim melu mvus e be Befarésias. 14 O mbe môs e sabbat ñwô Yésus a nga bo mbotok, a kuui môt ate mis. 15 Ajô ete Befarésias be nga sili nye jam a kôme yene de. Nde a nga jô be na, A nga wo'ô me mbotok e mis, ane me nga sôbe me, a me nga yen. 16 Ajô ete bevo'ô ya befrésias be nga jô na, Môte nyô a nji so e be Zambe, amu a ne te ba'ale môse sabbat. Ve bevo'ô be nga jô na, Môt a ne mbo abé, a ne ngul ya bo aka'a mendem di aya ? Ane nkandan ô nga bo e zañe jab. 17 Ajôete, be nga beta jô ndindime n, Womien w'ajô aya ajô dé, vôm a nga kuui wo mis ? Nde a nga jô na, A ne nkulumejô.

18 Ajôete be nga bo te buni ajô dé na, a nga too ndindim, a kôme fe yen, ve akekui be nga loene bebiaé be môt a nga yen. 19 Ane be nga sili be, a jô na, Ye mone wônane nyô nnye mi ajô na, a nga bialé ndim ? Nde éyoñe ji a nga yen aya ? 20 Ajô ete bebiaé be nga yalan a jô na, Bi ayeme na, mone wongane nyô, a na a nga bialé ndim, 21 ve jam a yene de éyoñe ji, bi ne te yem, nge za a te kuui nye mis, bia bi ne te yem. Sila'ane émien ; a nto nya môtô, émien a ye kobô ajô dé. 22 Bebiaé be nga jô mejô mete amu be nga ko Beyude woñ ; amu na, éyoñ éte ébien Beyude be yiliya na, nge môt a ye meme na, a ne Krist, a yiane titeban e sinagôg. 23 Ajô ete nde bebiaé bé be nga jô na, A nto nya môtô ; sila'an émien. 24 Ajô ete be nga loene môt a nga too ndim aloene baa, a jô nye na, Va'a Zambe duma ; bia bi ayeme na, môt nyô a ne mboabé. 25 Ajô ete môt ate a nga yalane na, Nge a ne mboabé, me ne te yem, jame da m'ayem na, me nga too ndim, ve éyoñe ji me nga yen. 26 Ajô ete be nga jô nye na, A te kuui wo mis aya 27 A nga yalane be na, Me maneya kate mia, amia te vô'ôlô. Amu jé mi abeta kômbô wô'ô ajô ete ? Ye mi ke mi akômbô bo beye'é bé ? 28 Ane be nga kpwe'ele nye a jô na, Womien ô ne ñye'é môt ate, ve bia bi ne beye'é be Môze. 29 Bia bi ayeme na, Zambe a nga kobô Môze, ve bi ne te yeme môt ate mfa'a a so. 30 Môt ate a nga yalan a jô be na, Jame ya semé di na, mia mi ne te yem mfa'a a so, ve a te kuui me mis ! 31 Bi ayeme na, Zambe a ne te wô'ô beboabé, ve nge môt éziñ a ko Zambe woñ, a bo fe nkômbane wé, nnye ate Zambe a wôk. 32 Aso kôa be nji tame wô'ô na, môt éziñ a nga kuui mis me môt a nga bialé ndim. 33 Nge môt ate a nji so e be Zambe, a nji bo ngul ya bo jam éziñ. 34 Be nga yalan a jô nye na, Womien ô nga bialé e mam abé été, ye bia w'aye'ele ? Ane be nga kuli nye atan.

Ndim Ya Nsim

35 Yésus a nga wô'ô na, be kuliya mô't ate atan. Nde éyoñ a nga koé nye, a nga jô nye na, Ye w'abuni Mone mô't ?
36 Mô't ate a nga yalan, a jô na, Nde, A Nti, a ne za, ane me ne buni nye 37 Yésus a nga jô nye na, O yeneya nye ; nnye
ate fe a kobô wo nyô. 38 Nde a nga jô na, A Nti, m'abuni. A nga kañe nye. 39 Ane Yésus a nga jô na, Me me nga zu e
si nyô na me bo ntyi'i ajô, ba be ne te yen, be yen ; a na, ba b'ayen be bo mindindim.

40 Ba be nga so e be Befrésias, ba be nye be nga too, ane be nga jô nye na, Ye bia fe bi ne mindindim ? 41 Yésus a
nga jô be na, Nge mi too bo mindindim, ve mi nji bi abé. Ve éyoñe ji, mi ajô na, Bi ayen ; abé denan e ngenan e too.

Nkana Ongôla Mintômba

10 1 M'abele fo'o ane m'ajô mia na, Mô't a bo te nyii mbé ôngôla mintômba été, ve a dañ été mfa'a mfe, mô't ate a
ne ñwuwub a ze mimfaka. 2 Nde mô't a nyiin e mbé, nnye a ne mba'ale mintômba. 3 Nnye ate mba'ale mbé a dii wô,
a mintômba mi awô'ô tyiñe jé. A loene fe mintômba mié a môé mab, wôna a kee mie atan. 4 Eyoñ ése a kuliya
mintômba mié mise atan, a tebe mie ôsu, a mintômba mi atôñe nye ; amu mi ayeme ytiñe jé. 5 Nde mi aye ke tôñe
mba'ale mintômba mfe, ve mate nye, amu mi ne te yeme tyiñe beba'ale befe. 6 Yésus a nga kane be nkana wu, ve
bôte bete be nga bo te yem mam me mbe, mme a nga kobô be.

Yésus Mbamba Mba'ale Mintômba

7 Ajô ete Yésus a nga beta jô be na, M'abele fo'o ane m'ajô mia na, Ma me ne mbé mintômba. 8 Ba bese, abim be
nga zu me ôsu, be ne miñwuwub a beze mimfaka, mintômba mi nga bo te wô'ô be. 9 Ma me ne mbé, nge mô't éziñ a
lôt e be ma, a ye nyiiban ; a ye nyiin été, akui atan, a yene fe bidi, 10 Nwuwub w'azu ve amu na, ô wub, ô wôé, a jian.
Ma me nga zu, ane mintômba mi aye yen ényiñ, a yene je mefok. 11 Ma me ne mbamba mba'ale. Mbamba mba'ale, a
ju ényiñe jé amu mintômba. 12 Mboésaé job a nji bo mba'ale, mintômba mi nji bo émié, a yene fe ze é za'ak, a lí'i
mintômba, a mate, ze ve bie mie, a tyamalane mie. 13 Amu a ne mboésaé job a ne te tyô'ô ajô mintômba. 14 Ma me
ne mbamba mba'ale, a m'ayem émiam, a émiam mi ayeme fe ma ; 15 avale fe ane Esa a yeme ma, a ma fe m'ayem
Esa, nde m'aju'u ényiñe jam amu mintômba. 16 Nalé fe, me nee mintômba mife, mi nji bo ôngôla vi. M'ayiane zu
mie, a mi aye wô'ô tyiñe jam. Nde mi aye bo mbame wua, a mba'ale wua. 17 Amu ajô ete nde Tate a nye'e ma, amu
mamien m'aju ényiñe jam, nde m'aye beta nyoñe je. 18 Teke'e mô't a vaa me je, ve m'aju je amu mamien. Me bili

ngul ya ju je, a me bili fe ngul ya beta nyoñe je. Abendé di nde me nga nyoñ be Esa wom. 19 Nkandan ô nga beta bo zañe Beyude amu mejô mete. 20 Nde bôt abui ya été be nga jô na, A bili mbia nsisim, a so'o fe étyi. Amu jé mi avô'ôlô nye ? 21 Bevo'o na, Minjôane mi mi nji bo mi mi mô't a bili mbia nsisim. Ye mbia nsisim a ne ngule ya kuui mindindime mis ?

Beyude B' abene Yésus

22 Eyoñ éte ébe'e ya Efubu tempel é nga kpwaan e Yérusalem ; a mbe ôyôn. 23 Ane Yésus a nga ke a wulu e tempel été, a mbala'a si Salômon. 24 Ajô ete Beyude be nga zu tebe nye mbôma'ane, be nga jô nye na, Nté mbé w'aye tyelé bia minlem e yôb ? Nge wo ô ne Krist, kete'e bia ne ngeëñ. 25 Yésus a nga yalane be na, Me nga kate mia, ve mi nji buni. Mimboan m'abo a jôé Esa wom, mmie mi akañete ajô dam. 26 Ve mia mi ne te buniamu mi nji mintômba ya be ma. 27 Mintômba miam mi awô'ô tyiñe jam, m'ayeme mie, mi atôñe ma ; 28 a m'ave mie ényañ ya nnôm éto, a mi aye ke jañ akekui nnôm éto. Teke'e mô't a ye wôlé me mie e mo. 29 Esa wom, nyô a nga ve me mie, a dañe bese ngu, a teke'e mô't a ne ngul ya wôlé mie e mo me Tate. 30 Bia Tate wom bi ne jôme jijia.

31 Beyude be nga beta to'é meko'o na, be lume nye. 32 Ane Yésus a nga yalane be na, Me nga liti mia mbamba mimboan abui ya be Tate, za aka'a mboane ya été mi alume de mekok ? 33 Beyude be nga yalane nye na, Bi ne te lume wo mekok amu mbamba mboan, ve amu nkobô ébiasé Zambe, amu na, ô too mô't, w'aviane bo womien ane Zambe. 34 Yésus a nga yalane be na, Ye e se ntilan e metiñe menane na, Ma me nga jô na, Mi ne bezambe ? 35 E ba mejô me Zambe me nga kui e be be, nge Zambe a nga loene be na, bezambe, a mintilan mi vo'o tyamban, 36wôna mô't Esa a nga fubu, a lôme fe nye e si nyô, ya mia mi ajô nya na, W'akobô nkobô ébiasé Zambe, amu m'ate jô na, Me ne Mone Zambe ? 37 Nge m'abo te bo mimboan mi Esa wom, te bunane ma. 38 Ve nge m'abo mie, to'ona mi ne te buni ma, buna'ane mimboane mite, nde ete mi aye wôk a yeme na, Tate a ne e be ma, a ma e be Tate. 39 Ajô ete be nga jeñe na, be beta bi nye ane a nga kôlô be e mo.

40 Ane a nga beta kôlô, a ke e Yordan e yat, akui vôm Yôhanes a nga bo mbaptizô atata'a ; ane a nga tabe wôé. 41 Ane bôt abui be nga ke e be nye, be na, Yôhanes a nji ke fo'o bo ndem éziñ, ve abim mam mese Yôhanes a nga kobô ajô mô't nyô, me mbe bebela. 42 Ane bôt abui be nga buni nye wôé.

Rev. Matthias MEYE
AWU LAZARUS Secrétaire Général 1961.....

11

1 Nde môť éziñ a nga kon, Lazarus ya Béthania , jale Maria ba monyañe wé Marta. 2 Maria ate a nga wo' o Nti mbone mbamba menyum, a fimi fe nye mebo a ésile jé, nnye ndôme jé é nga kon. 3 Ajô ete bekale bete be nga lôme Yésus tyiñ, a jô nye na, A Nti, Môť w' anye' e a kon. 4 Nde éyoñ Yésus a nga wô' ô ajô ete, a nga jô na, Okone vi ô nji bo ajô ya awu, ve amu duma Zambe, ane Mone Zambe a ye wum amu vie, 5 Nde Yésus a nga bo a nyeke' e Marta baa monyañ, a Lazarus. 6 A jô ete éyoñ a nga wô' ô na a kon, ane a nga beta tabe melu mebaé vôm ate. 7 Nde mvus éte, a nga jô beye' é bé na, Mbeta' a kean Yudéa. 8 Beye' é be nga jô nye na, A Rabbi, ana' ana Beyude be ndôme jeñe na, be lume wo mekok, nde ye w' abeta ke wôé ? 9 Yésus a nga yalane na, Ye môs ô nji bo mewolo awôm a mebaé ? Nge môť éziñ a wulu a môs, a bo te kolé ôbak, amu a yen éfufub ya si nyô. 10 Nde nge môť éziñ a wulu alu, a kolé ôbak, amu éfufub é nji bo e be nye. 11 Eyoñ a kobôya mejô mete, mvus éte a nga jô be na, Mvôé janggan Lazarus é bôô ôyo, ve m' ake ane m' aye vele nye. 12 Ajô ete beye' é be nga jô nye na, A Nti nge a bôô ôyo, ke a ye nyiñ. 13 Ve Yésus a nga kobô ajô awu dé ; ve be, be nga sí' a ko na, a kobô ajô awo' an ya ôyo. 14 Eyoñ éte Yésus a nga jô be ne ngeñ na, Lazarus a wuya, 15 a m' avak amu mia, nde mi aye buni ; a amu me nji bo wôé. Ve nkelan e be nye. 16 Ajô ete Thomas, mot b' aloene Didimus, a nga jô, beébe beye' é na, Bia fe , nkelan, bia be nye bi wu nsamba.

Yésus a Nwômôlan Enyiñ

17 Ajô ete éyoñ Yésus a nga ke, a zu koé na, Lazarus a mbôô soñ melu menyin. 1 Bétania a mbe bebé Yérusalem , nté kilômita éla. 19 Nde bôt abui ya Beyude be nga mane suan e be Marta baa Maria, ane nbe nge volô be minlem ajô ndôme jab. 20 Ajô ete, éyoñ Marta a nga wô' ô na, Yésus a zu, a nga ke tôbane nye ; ve Maria a ngenan a too si e nda été. 21 Ajô ete, Marta a nga jô Yésus na, A Nti , nge w' atoo va, ve ndôme jam é nji wu. 22 Ja' ana éyoñe ji, m' ayeme na, mam mese jam w' aja' é Zambe. Zambe a ye ve wo de. 23 Yésus a nga jô nye na, Nyo ndôm a ye wômô . 24 Marta a nga jô nye na, m' ayeme na a ye wômô éyoñ ya ñwômôlan e môs w' asu' ulan. 25 Yésus a nga jô nye na, Ma me ne ñwômelan a ényiñ. Môť a buni ma, ja' ana a nga wu, a ye nyiñ ; 26 a môť a vee, a buni' i ma, a ye wu akeui nnôm éto. Ye w' abuni jam ete ? 27 A nga jô nye na, Yaa, A Nti me buniya, Wo ô ne Krist, Mone Zambe nnye a soya e si nyô.

Yésus a Nga Yi

28 Eyoñ Marta a nga mane jô mejô mete, a nga ke loene monyañe wé Maria, a jô nye na, Nye' ele a soya, a loene fe wo. Nde Eyoñ Maria a nga wô' ô nalé, a nga ji' a kôlô e si a ke be nye. 30 Eyoñ éte Yésus a ngenan te kui nlam, a ngenan a too e vôm Marta a nga ke tôbane nye. 31 ajô ete Beyude, ba be nye be nga to e nda be volô' ô nye nlem,

Rev. Matthias MEYE

Secrétaire Général 1961.....

éyoñ be nga yene Maria a jika'a kôlô e si a kui atan, be nga tôñe nye, be si'a ko na, a ke e soñ ane a ye yi wôé. 32 Ajô ete éyoñ Maria a nga kui e vôm Yésus a mbe, a yene nye, a nga ku si mebo mé, a jô nye na, A nti, nge ô nga too va, ve ndôm jam é nji wu. 33 Ajô ete éyoñ Yésus a nga yene nye a yiik, a yene fe Beyude ba be nye be nga zu nsamba, be yii du, nsisim ô nga dañe yôñe nye, nlem ô nga bo'o fe nye. 34 Ane a nga jô na, Mi nga jame nye vé ? Be nga jô nye na , a Nti za'a yen. 35 Yésus a nga yi . 36 Ajô ete Beyude be nga jô na, O lôô, ane a nga nye'e nye. 37 nde bevo'o ya été be nga jô na, ke mô't nyô nye a nga kuui mise me ndindim ye a mbe te ngul ya bo na, mô't nyina a bo te wu ?

Lazarus A Bulan Enyiñ

38 Ajô ete Yésus a nga beta dañe yôñ e nleme été, a kui e soñ, é mbe mbas akok, akok é bete fe de e yôb. 39 Yésus a nga jô na, Va'an akok ! Marta kale mô't a mbe ñwuan a nga jô nye na, A Nti, éyoñe ji a nga nyum, amu awu den melu menyin. 40 Yésus a nga jô na, Ye me nji jô wo na, Nge w'abuni, w'aye yen étôto'o Zambe ? 41 Ajô ete, be nga vaa akok. Ane Yésus a nga bete mis e yôb, a jô na, A Tat, m'ave wo akéva amu ô nga wô'ô ma. 42 Me nga yeme na, w'awô'ô me kom ése. Ve m'ate kobô amu ékoane bôt é tele mbôma'ane, nde b'aye buni na, wo ô nga lôme ma. 43 Nde éyoñ a nga kobô mejô mete, a nga bete tyiñ e yôb ngule na, A Lazarus, kui atan ! 44 Mô't a mbe ñwuan a nga kui atan, a too nka'ane mebo a mo a bindelé bi soñ, éyañese é nga to fe nye ñyalan asu. Yésus a nga jô be na, ti'ane nye, mi jô'ane nye a ke.

Emo'o Ya Wôé Yésus

(Mat 26 : 1-5 ; Mark 14 : 1, 2 ; Luk 22 : 1, 2)

45 Ajô ete bôte abui ya Beyude be nga zu e be Maria, ayen be nga yen e jam d'ate boban, be nga buni nye, 46 Ve bevo'o ya été be nga kôlô a ke e be Befarézias, a kate be mam Yésus a nga bo. 47 Ajô ete minlô beprêtre a Befarézias be nga sula'an émo'o, be na, Bi bo aya ? Amu na mô't nyô a bo mendem abui. 48 Nge bi ajô'é nye a ke ôsu ana, ke bôte bese b'aye buni nye ; a bôt ya Rôm b'aye zu jiane vôme wongan a ayoñe dangan. 49 Nde mô't éziñ ya be be Kaifa, amu a nga too njô beprêtre mbu ôte, a nga jô be na, Mia mi ne te yem jam éziñ, 50 nge simesane na, a ne mia mvaé nge mô'te wua a wu amu ajô ya bôt, a sa na ngum ayoñ w'ajaaban. 51 Nde a nga bo te kobô jame di amu émien ; ve amu a mbe njô beprêtre mbu ôte, a nga kulu mejô na, Yésus a yiane wu amu ajô ya ayoñ ; 52 a sa ajô ya ayoñ étam, ve ane a ye koane bone be Zambe be nga mialan be bo jôme jia. 53 Ajô ete, akôlô mô's ôte be nga bôndé fe'e ane b'aye wôé nye.

54 Ajô ete Yésus a nga bo te beta wulu ne ngeefi e Beyude été, ve a nga kôlô vôm ate, a ke afôla si é ne bébé nkôte si, nlam b'aloene na Efraim, a tabe wôé ba be beye'é bé.

55 Nde Paska Beyude é mbe bébé, ane bôt abui be nga bet e Yérusalem, be so'o mefôla ya si éte ôsusua Paska, ane b'aye tune bebien. 56 Ajô ete, be nga jeñe Yésus, bebien bebien be nga kobô, be tele e tempel été, be na, Mi asimesane aya, Ye a ye bo teke'e zu ébek ? 57 Nde minlô beprêtre a Befarésias be nga ve abendé na, nge mô't éziñ a ne yem vôme a né, a yiane kulan ajô ete, nde be ne bi nye.

Nwo'obane Mbon Ya Bétania

(Mat 26 : 6-13 ; Mark 14 : 3-9)

12 1 Ajô ete éyoñ Paska é lí'ya melu mesaman, Yésus a nga kui e Bétania e vôm Lazarus a mbe, nnye Yésus a nga wômôlô miñwuan. 2 Ajô ete be nga yame nye bidi wôé, Marta a nga saé e tawôlô, Lazarus a nga too mô'te wua ya ba be nga too e tawôlô ba be nye. 3 Ajô ete Maria a nga nyoñ mbon mbamba menyum, tañ étune kilô, ô mbe mfubane nard a beta tañ, ane a nga wo'o wô Yésus e mebo, a fimi fe nye mebo a ésile jé. Nde nda é nga jaé menyum me mbon. 4 Ane Yudas Iskariôt, mô'te wua ya beye'é bé, nyô a ye koñe nye, a nga jô na, 5 Amu jé be nga bo te kuane mbone mbamba menyume wu, tañe denié mintete milal, é veban e be minzôzoé ? 6 a nga kobô éfia éte, sa amu na, a nga tyô'ô minzôzoé, ve amu a mbe ñwuwub, amu a be'e mfe'e moné, a nga bo a toké'é biôm b'afuti été. 7 Ajô ete Yésus a nga jô na, Jôké'é nye, amu na a nga ba'ale mbone wu mfa'a ya énjambime jam. 8 Amu mi bili minzôzoé mia be be kom ése, ve ma mi nji bi kom ése.

Emo'o Ya Wôé Lazarus

9 Ajô ete beta ékoane ya Beyude a nga yeme na Yésus a ne wôé, ane be nga zu, sa amu ajô Yésus étam, ve ane b'aye fe yene Lazarus, mô't a nga wômôlô miñwuan. 10 Nde minlô beprêtre mi nga bôndé fe'e ane b'aye wôé Lazarus, 11 amu bôt abui ya beyude be nga wondô amu nye, a buni Yésus.

Rev. Matthias MEYE
Secrétaire Général 1961.....

Nyiine Mefôn Ya Yérusalem

(Mat 21 : 1-11 ; Mark 11 : 1-11 ; Luk 19 : 28-40)

12 Tyé kpwa, beta ékôane bôt a nga so ébek, éyoñ be nga wô'ô na Yésus a zu e Yérusalem, 13 be nga nyoñe mebui melen, a ke tôbane nye. Ane be nga yôtane na,

“ Hôsana !

Ebotan a nyô a zu a jôé Nti,

Njôô Israël.”

14 Nde éyoñ Yésus a nga koé mona éjakas, ane a nga tabe nye e yôb, aval ane e ne ntilane na

15 “ Te ko woñ, a ngone Siôn,

O lôô, Njô bote wôé a zu, a too étoñ éjakase yôb.”

16 Beye'é bé be nga to te yeme mam ma atata'a. Ve éyoñ Yésus a nto ñwumulan, éyoñ éte be nga simesane na mejô mete me mbe ntilan ajô dé, a na me nga boban e be nye. 17 Ajô ete ékôane bôt, ba be nga too éyoñ a nge loene Lazarus e soñ, a wômôlo fe nye akôlô miñwuan, é nga kañete jam ete. 18 Amu ajô ete ekôane bôt éfe é nga ke tôbane nye, amu be nga wô'ô na, a boya ndeme nyô. 19 Ajô ete Befarésias be nga jôane na, mi lôô na, mi ne teke'e volô jôm , tama yena, Si nyô j'atôñe nye mvus !

Begrek Beziñ B'ajeñe Yésus

20 Nde Begrek bevo'o be mbe été mfa'a ya bôt be nga bet ane b'aye kañe Zambe ébe'e été. 21 Ajô ete, bebien be nga zu e be Filip, mô't ya Betsaida ya Galiléa ; ane be nga sili nye na, A Nti bi akômbô yene Yésus. 22 Filip a nga zu kate Andréas ; Andréas a nga ke ba Filip, be nga kate de Yésus. 23 Nde Yésus a nga yalane be a jô na, Awolo e kpwaaneya, ane Mone mô't a ye wum. 24 M'abele fo'o ane m'ajô mia na, Nge fese blé j'aku e si, j'abo te wum, j'aye tabe ébien étam. Ve nge j'awu, j'awume bibuma abui. 25 Mô't a nye'e ényifne jé, a jaa je, a mô't a siñ ényifne jé e si nyô a ye ba'ale je akekui ényifne ya nnôm éto. 26 Nge mô't éziñ a saéane ma, a tame tôñe ma ; vôm me too, vôm ate fe mvolô wom a ye tabe. Nge mô't éziñ a saéane ma, Tate a ye semé nye.

Mone Mô't A Yiane Beteban E Yôb.

27 Eyoñe ji nlem w'abo'o ma ; nde me ne jô aya ? A Tat, nyi'i ma mfa'a ya awolo dina. Ve amu ajô ete me nga kui e awolo di. 28 A Tat, wumulu'u jôé dôé. Ajô ete tyiñ é nga so yôb été na, Me wumuluya de, m'aye beta wumulu fe

Rev. Matthias MEYE
Secrétaire Général 1961.....

de. 29 Ajô éte ékôane bôt é nga tele valé, be nga wô'ô éfia éte, be nga jô na, Ndume mveñ w'ate duñ. Bevo'o be nga jô na, Engel nnye a te kobô nye. 30 Yésus a nga yalan, a jô na, Tyiñe nyô é nji bo amu ajô dam, ve amu ajô denan. 31 Eyoñe ji, njôô ya si nyô a ye wuaban atan. 32 Ma fe, nge m'aye beteban e yôb, e si nyô, m'aye dutu bôte bese be zu e be ma. 33 Nde a nga jô éfia éte, a liti aka'a ndem ya awu a yiane wu. 34 Ajô ete ékôane bôt é nga yalane nye na, Bia bi nga wôk, e metiñ été na, Krist a ye tabe akekui nnôm éto ; ve wo w'ajô aya na Mone mô't a yiane beteban e yôb ? Mone mô't ate a ne za ? 35 Ajô ete Yésus a nga jô be na, Efufub é ngenan é too e be mia mone nté. Wula'an, nté mi bili éfufub éte, a za bo na, dibi d'aye dilane mia. Mô't a wulu e dibi été, a ne te yem mfa'a mbé a ke. 36 Nté mi bili éfufub, buna'an éfufub éte, nde ete mi aye bo bon ya éfufub.

Te Buni Ya Beyude

Yésus a nga kobô mejô mete, ane a nga kôlô, a ke sobô be. 37 Nde akô'sabo a nga bo aka' abim mendem di, mise mab me lôô, ve be nga bo te buni nye ; 38 nde mejô Yésaya nkulemejô a nga jô m'aye tôéban, na,

“ A Nti, Za a nga buni foé jangan ?

A wo Nti ô nga kuliban e be za ?”

39 Amu ajô ete be nga bo te ngul ya buni, amu Yésaya a nga beta jô na,

40 “ A nga dibe mise mab, a bo fe minleme miab ayet ;

Be za yen a mise mab, a yem a minlem, a kôñelan, ane m'aye saé be.”

41 Yésaya a kobô mejô mete, amu a nga yen étôto'o jé, a kobô fe ajô dé. 42 Ve akô'sabo nalé, ja'ana mfa'a ya bivet, abui e nga buni nye, be nga bo te meme nalé, amu woñ be nga ko Befarésias, a za bo na, b'aye titane be e sinagôg ; 43 amu be nga nye'e дума d'aso e be bôt, a sa дума d'aso e be Zambe.

Ntyi'an Ajô Amu Mejô Me Yésus

44 Nde Yésus a nga yôtan, a jô na, Mô't a buni ma, a ne te buni ma, ve a buni mô't a nga lôme ma ; 45 a na, mô't a yene ma, a yene mô't a nga lôme ma . 46 Mamien me zuya si nyô na, me bo éfufub, nde ete mô't ase a buni ma, a ye bo te tabe e dibi été. 47 A nge mô't éziñ a wô'ô minjôane miam, te ba'ale mie, mamien me ne te tyi'i ajô dé ; Amu me nji zu na, me tyi'i ajô ya si nyô, ve amu na, me nyii si nyô. 48 Mô't a bene ma, a teke'e nyoñe minjôane miam, a bili

Rev. Matthias MEYE

Signature: 08/01/1981

môt a tyi'i ajô dé. Mejô me maneya kobô, mme mete m'aye tyi'i ajô mô tate e môs w'asu'ulan. 49 Amu me nga bo te kobô mejô ma amu mamien ; ve mô tate nga lôme ma, nnye a ne Esa wom, émien a nga ve me abendé ya jam m'ayiane jô, a jam m'ayiane kobô ; 50 a m'ayeme na, abendé dé é ne ényîne ya nnôm éto. Ajô ete, mam m'akobô, m'akobô me ve aval ane Esa wom a nga jô ma.

Nsôbane Beye'é Mebo

13 1 Eyoñ ébe'e Paska é ngenan te bo, Yésus a nga yeme na awolo e kpwaaneya, nde a ye kôlô si nyô a ke e be Esa ; a vôm a nga nye'e ba be mbe émbé e si nyô, a nga nye'e be akekui asu'ulan. Nde éyoñ ndian ô nga bo, éyoñ éte diable a futiya de e nleme Yuda Iskariôt, mone Simôn na, a koñe nye. 3 Amu Yésus a nga yeme na, Esa a nga ve nye mam mese e mo, a na, a nga so e be Zambe, a ke fe e be Zambe, a nga sôté ngômesané jé, a to'é tawôla a tiñeti nye angeteñ. 5 Mvus éte a nga sôé mendim e fandé, a taté sôbô beye'é mebo, a fimi me a tawôla a nga tii nye angeteñ. 6 Ajô ete a nga kui e be Simôn Pétrus, nnye a nga jô nye na, A Nti, ye w'asôbe me mebo ? 7 Yésus a nga yalan a jô nye na, jam m'abo, ô ne te yeme de éyoñe ji, ve w'aye yeme de mvus éte. 8 Pétrus a nga jô nye na, W'aye sôbe me mebo, ne tya ! Yésus a nga yalane nye na, Nge m'abo te sôbe wo mebo, wôna ô nji bo ngab e be ma. 9 Simôn Pétrus a nga jô nye na, A Nti, sa ve mebo étam, ve nalé fe mo a nlô. 10 Yésus a nga jô nye na, Mô tate maneya woban, a yiane ke beta sôbe jôm, ve mebo étam, amu a ne mfuban nyôle ése. Ke mi ne mfuban, ve sa bese. 11 Amu a nga yeme mô tate nga koñe nye. Amu ajô ete nde a nga jô na, Mi nji bo mfuban bese.

12 Ajô ete éyoñ a nga mane sôbô mebo, a nga nyoñe ngômesane jé, a beta tabe si, a jô be na, Ye mi ayem jam m'ate bo mia ? 13 Mia mi aloene me na, Nye'ele, a Nti, a mi abele, amu me ne nye. 14 Ajô ete, nge ma, Nti a Nye'ele, m'ate sôbe mia mebo, mia fe mi ayiane sôbane mebo ; 15 amu m'ate ve mia éve'ela'a na, aval ane m'ate bo mia, mia fe mi ayiane bo nalé. 16 M'abele fo'o ane m'ajô mia na, Olo ô ne te dañe nti wé, nalé fe mô tate ne nlôman, a ne te dañe mô tate nga lôme nye. 17 Nge mi ayeme mam ma mvom a mia nga mi a bo me. 18 Me ne te kobô ajô mia bese ; m'ayeme ba me nga tob. Ve me nga tobe bôt, amu ntilan w'ayiane tôéban na, Mô tate di fembé jam, a nga beté étimikili jé, a tyañete ma. 19 Ataté éyoñe ji m'akate mia jam d'aye bo, éyoñ é za bo'ok, nde ete éyoñ d'aye boban, mi aye buni na, ma me ne nye. 20 M'abele fo'o ane m'ajô mia na, Mô tate nyoñ nyô m'alôm, nnye a nyoñe ma. Nde mô tate nyoñe ma, a nyoñe fe nyô a nga lôme ma.

Rev. Matthias MEYE
Secrétaire Général 1961.....

Yésus A Kulu Ajô Nkoñane Wé

(Mat 26 : 20-25 ; Mark 14 : 17-21 ; Luk 22 ; 21-23)

21 Eyoñ Yésus a nga mane kobô mejô mete, nsisim ô nga ju'ulane nye, ane a nga kañete, a jô na, M'abele fo'ô ane m'ajô mia na, môte wua ya be mia a ye koñe ma. 22 Beye'é be nga ke b'afômban, te yeme môte a kobô nye. 23 Môte wua ya beye'é bé a nga ye'e Yésus e tôé, nnye Yésus a nga bo a nyeke'e. 24 Ajô ete Pétrus a nga febe môte ate, a jô nye na, Sili'i nye nyô a kobô nye. 25 Môte a nga ye'ebe Yésus nalé, a nga jô nye na, A Nti, a ne za ? 26 Ajô ete Yésus a nga yalane na, Môte m'aye dub ôfufus édi'a, a ve nye vie, nnye le. Ajô ete a nga dub ôfufus édi'a, [a nyoñe vie], a ve Yudas, mone Simôn Iskariôt. 27 Nde éyoñ a nyoñeya ôfufus édi'a, Satan a nga nyiin e be nye. Ajô ete Yésus a nga jô nye na, Jam w'abo, jika'a bo de ! 28 Nde bôt be nga to si tawôlô, teke'e môte ya été a nga yem amu jé a te jô nye nalé. 29 Amu bevo'ô be nga sí'a ko na, vôm Yudas a nga ba'ale mfe'e moné, Yésus a nga jô nye na, Kuse' biôm bi ajembane bia ébek ; nge na, a ve minzôzoé jôm éziñ. 30 Ajô ete éyoñ a nyoñeya ôfufus édi'a, môte ate a nga ji'a kui atan ; éyoñ éte alu é nto.

Mfefé Abendé

31 Eyoñe ji, Mone môte a nto ñwumulan, A Zambe a nto ñwumulan e be nye. 32 [nge Zambe a nto ñwumulan e be nye], Zambe a ye wumulu nye e be émien, été été a ye wumulu nye. 33 A ayôme bon, mone nté me ngenan e be mia, Mi aye jeñe ma, ; nde aval ane me nga jô Beyude na, Mfa'a m'ake, mia mi vo'ô kui wôé ; aval ete fe m'ajô mia éyoñe ji. 34 M'aye ve mia mfefé abendé na, mi nye'esan ; aval fe ane me nga nye'e mia, mia fe mi nye'esan. 35 E zene nyô nje bôte bese b'aye yeme na, mi ne beye'é bam, nge mi bili nye'an, wua e be nyô mbok.

Nkatane Pétrus W'akuluban

(Mat 26 : 31-35 ; Mark 14 : 27-31 ; Luk 22 : 31-34 ;)

36 Simôn Pétrus a nga jô nye na, A Nti, w'ake mfa'a mbé ? Yésus a nga yalane na, Mfa'a m'ake, ô vo'ô tôñe me éyoñe ji, ve w'aye tôñe me mvus été. 37 Pétrus a nga jô nye na, A Nti, amu jé me vo'ô tôñe wo éyoñe ji ? M'aye ju ényifne jam amu ajô dôé. 38 Yésus a nga yalane na, Ye w'aye ju ényifne jôé ajô dam ? M'abele fo'ô ane m'ajô wo na, nnôme kup a ye ke tame loñ ve akekui ô kateya ma mekate mela.

Yésus Zen J'ake E Be Tate

14

1 Nlem ô bo'ok te bo'o mia ; buna'ane Zambe ; buna'ane fe ma. 2 E nda Esa wom, bitaba'a bi ne abui ; ve nge momo, wôna me nga ye kate mia ; amu m'ake kôme mia vôm. 3 A nge m'ake kôme mia vôm, m'aye beta zu nyoñe mia e be mamien ; nde ete vôm me too, mia fe mi aye tabe. 4 A mfa'a m'ake mi ayeme zen. 5 Tômas a nga jô nye na, A Nti, bi ne te yem mfa'a w'ake, bi ne yem zen aya ? 6 Yésus a nga jô nye na, Ma me ne zen, a benya mejôô, a ényíñ. Nge te ma, teke'e mô't a ne kui e be Tate. 7 Nge mi too yeme ma, ve mi nga yeme fe Esa wom. Ataté éyoñe ji, mi ayeme nye, mi yeneya fe nye. 8 Filip a nga jô nye na, A Nti, liti'i bia Eso, a nalé a yiane bia. 9 Yésus a nga jô nye na, A Filip, ye abime éyoñ bia be mia bi tabeya di, ve ô ngenane te yeme ma ? Mô't a yeneya ma, a yeneya fe Tate. Womien w'ajô na, Liti'i bia bia Eso aya ? 10 Ye ô ne te buni na, me ne e be Tate, a Tate a ne e be ma ? Minjôan m'ajô mia, me ne te jô mie amu mamien, ve Tate a too e be ma, nye a bo bisaé bié. 11 Buna'ane ma na, me ne e be Tate , a Tate a ne e be ma. Ve nge momo, wôna, buna'ane ma amu bisaé bite bibien. M'abele fo'o ane m'jô mia na, Mô't a buni ma, bisaé m'abo, nnye fe a ye bo bie ; a ye fe bo bi bi adañe bili ; amu m'ake e be Tate. 13 A jam ese mi aye ja'é amu jôé dam, m'aye bo jam ete, Tate a ye wum e be Mon. 14 Nge mi aja'é jam éziñ amu jôé dam, m'aye bo de.

Yésus A Ka'a Nsoane Nsisim

15 Nge mi anye'e ma, mi aye ba'ale mebendé mam ; 16 a ma fe m'aye ye'elane Tate, a ye ve mia Mvolô minlem mfe, nnye a ye tabe e be mia akekui nnôm éto. 17 Nnye a ne Nsisim benya mejôô. Nnye ate si nyô é vo'o nyoñ, amu é ne te yene nye, nge yeme nye. Mia mi ayeme nye, amu a too e be mia, nalé fe ane e be mia. 18 M'aye lí'i mia bobebnyui ; m'azu e be mia. 19 Mone nté a ngenan, si nyô j'aye bo te fe beta yene ma. Ve mia mi aye yene ma, amu mamien m'anyiñ ; mia fe mi aye nyiñ. 20 Mô's ôte mi aye yeme na, me ne e be Tate a mia fe e be ma, a ma fe e be mia. 21 Mô't a bili mebendé mam, a ba'ale fe me, nnye ate a nye'e ma. Nde mô't a nye'e ma, Tate wom a ye nye'e nye, a ma fe m'aye nye'e nye, a liti nye mamien. 22 Yudas, sa Iskariôt, a nga jô nye na, A Nti, a nto fe aya na, w'aye liti bia womien, ve sa si nyô ? 23 Yésus a nga yalan a jô nye na, Nge mô't a nye'e ma, a ye ba'ale mejô me nga jô, a Tate wom a ye nye'e nye, a bi aye zu e be nye, a kôm étaba'a e be nye. 24 Mô't a ne te nye'e ma, a ne te ba'ale mejô me nga jô. Mejô mi awôk, me nji bo émam, ve ma me tate a nga lôme ma.

25 Me maneya kobô mia mam ma, bia be mia bi ngenan bi too. 26 Nde mvolô minlem, Mfufub Nsisim, nyô Tate a ye lôm a jôé dam, nnye ate a ye ye'ele mia mam mese ; a ye fe bo mia na, mi simesane mam mese me nga jô mia. 27 Mvo'é m'alí'i mia nyô, mvo'é jam mamien m'ave mia ; sa aval ane si nyô j'ave, nde m'ave mia. Nlem ô bo'o te bo'o mia, a ô bo'o te fô'ôban. 28 Mi ate wôk ane m'ate kate mia na, m'ake, a m'azu e be mia. Nge mi nga nye'e ma, ve mi nga ye wô'ô mvaé na, m'ake e be Tate amu na Tate a dañe ma. 29 Eyoñe ji me kateya fe mia jam éyoñ é za bo'ok, nde

ete, éyoñ ése d'aye boban, mi aye buni. 30 M'aye bo te fe beta kobô mia mam abui, amu njôô ya si nyô a zu, ve a nji bi jam éziñ e be ma. 31 Ve ane si nyô é ne yeme na, m'anye'e Tate, a na, m'abo ve avale Tate a nga bendé ma, kôla'an e si, bi kôlô vôm nyô !

Yésus Nya Ndi'i

15 1 Ma me ne nya ndi'i, a tate wom a ne nkômafub. 2 Afas ese e ne e be ma, e too te wum bibuma, a vaa de ; afas ese d'awum bibuma, a sebe de e wum bibuma abui. 3 Mia mi nto mfuban amu mejô me nga kobô mia. 4 Taba'an e be ma, a ma fe e be mia. Aval ane afas e vo'o wum bibuma amu ébien, nga ve d'atabe e be ndik, nalé ate fe mia, nga ve mi atabe e be ma. 5 Ma me ne ndik, mia mi ne mefas, mô't a tabe e be ma, a ma fe e be nye, nnye a wum bibuma abui, amu me momo, mi vo'o bo jam éziñ. 6 Nge mô't a bo te tabe e be ma, éyoñ éte a wuaban atan, aval ane afas, e nga viele, b'akôane mefas, a wua me nduan, me nga dik. 7 Nge mi atabe e be ma, a minjôane miam mi atabe e be mia, jaka'ane jam ese mi ne kômbô a d'aye boban e be mia, 8 A zen éte nje Tate wom a ye bo ñwumulan na, mi wum bibuma abui ; nalé mi aye bo beye'é bam. 9 Aval ane Tate a nga nye'e ma, ma fe me nga nye'e mia ; taba'an nye'ane wom été. 10 Nge mi aba'ale mebendé mam, mi aye tabe e nye'an wom été, avale fe ane me nga ba'ale mebendé me Tate wom, a m'atabe e nye'ane wôé été.

11 Me maneya kobô mia mam ma, nde été meva'a mam mamien m'aye bo e be mia, a na, meva'a menan m'aye jaé ; 12 Abendé m'ave mia nde dina na, nye'esa'an ; avale fe ane me nga nye'e mia. Teke'e nye'an w'adañ wu ya mô't a ju ényiñe jé amu bemvôé bé. 14 Me nji fe beta loena mia na, bebobisaé, amu mboésaé a ne te yem jam nti wé a bo. 15 Ve me maneya loene mia bemvôé, amu mam mese me nga wô'ô e be Tate wom, me nga liti mia me. 16 Sa mia mi nga tobe ma, ve ma me nga tobe mia, a telé mia mi ke wum bibuma, a na, bibuma bienan bi libi'i ; a na, jam ese mi aja'é Tate a jôé dam, a ye ve mia de. 17 M'abendé mia mam ma, ane mi aye nye'esan.

Ziñ Ya Si Nyô

18 Nge si nyô j'asiñe mia, ma é nga tate siñ. 19 Nge mi too bo ba ya si nyô, ve si nyo é nga ye nye'e jôme jé ébien. Ve amu mi nji bo ba ya si nyô, ve me nga tobe mia e si nyô, a kandé mia a si nyô, amu ajô ete nde si nyô j'asiñe mia. 20 Simesa'ane mejô m'ate kate mia na, Mboésaé a ne te dañe nti wé. Nge be nga kpwe'ele ma, b'aye fe kpwe'ele mia.

Rev. Matthias MEYE

Secrétaire Général, 1961

Nge be nga ba'ale mejô me nga jô, b'aye fe ba'ale émenan. 21 Ve b'aye bo mia mam ma mese amu jôé dam, amu be ne te yeme mô't a nga lôme ma. 22 Nge me too bo te zu a kobô, ve be nga ye bo te bi abé. Ve éyoñe ji be ne te bi éfia ya veñ mfa'a ya abé dab. 23 Mô't a siñe ma, a siñe fe Tate wom. 24 Nge me too bo te bo bisaé e zañe jab, mbie teke'e mô't mfe a nga tame bo, ve be nga ye bo te bi abé. Ve éyoñe ji, be yeneya ma, a Tate wom, be siñeya fe ma a Tate wom. 25 Ve jame di e boya, nde ete mejô me ne ntilan e metiñe mab éte m'aye tôébane na, be nga siñe ma é zesé.

26 Eyoñ ésee Mvolô minlem a ye so, nyô mamien m'aye lôme mia, a so'o e be tate, nnye a ne Nsisim benyaa mejô, w'aso e be Tate, nnye ate a ye kañete ajô dam ; 27 a mia fe mi aye kañete, amu mi tabeya e be ma aso atata'a.

16 1 Me maneya kobô mia mam ma nde e te mi aye bo te kolé ôbak. 2 B'aye titane mia e sinagôg ; yaa, awolo d'azu ane mô't ase a wôé mia a ye si'a ko na a bo ésaé ya nkañane Zambe. 3 A b'aye bo mam mete, amu be nga bo teke'e yeme Tate, nga ma. 4 ve me maneya kobô mia mam ma, nde ete éyoñ ése awolo ete d'aye kpwaan, mi aye simesane mam mete na mamien me nga kate mia me.

Esaé Nsisim

Me nga bo te kate mia mam mete aso atata'a amu me nga too e be mia. 5 Ve éyoñe ji m'akôlô a ke e be mô't a nga lôme ma, a teke'e mô't ya be mia a sili me naa, W'ake vé ? 6 Ve amu me maneya kobô mia mam ma, ôlun ô jaéya mia e minlem. 7 Ve m'akate mia bebela na, e ne mia mvaé ane m'akôlô. Amu nge m'abo te kôlô, Mvolô minlem a ye ke zu e be mia. Ve nga m'ake, m'aye lôme mia nye. 8 Nnye fe, éyoñ a ye so, a ye kpwée si nyô ajô abé, a ajô zôsôô, a ajô ntyi'ane mejô : 9 ajô abé, amu b'abo te buni ma, ; 10 ajô zôsôô, amu m'ake e be Tate wom, mi te fe beta yene ma. 11 Nde ajô ntyi'ane mejô, amu ajô njôô ya si nyô e maneya tyi'i.

12 Me ngenan me bili mam abui ya kate mia, ve mi vo'o jibi me éyoñe ji. 13 Nde éyoñ ése mô't ate a ye so, nnye a ne Nsisim benyaa mejô, a ye tebele mia mfa'a ya benya mejô mese ; amu a ye bo te kobô amu émien, ve mam mese, abim a wôk, nde ete a ye kobô, a ye kate mia mam m'azu. 14 Nnye ate a ye wumulu ma, amu a ye nyoñe jam é ne éndam, a kate mia de. 15 Mam mese abim ane Tate a bili, me ne émam. Amu ajô ete nde m'ate jô mia na, Nsisim w'aye nyoñe jam e ne éndam, a kate mia de.

Olun W'aye Veñesane Mevak

16 Mone nté a ngenan, mi aye bo te fe yene ma, a mone nté mfe, mi aye yene ma. 17 Ajô ete beye'é bevo'o be nga ke b'ajôane na, Za aka'a ajô a kate bia di na, Mone nté, mi aye bo te yene ma ; a mone nté mfe, mi aye yene ma ? a na, amu m'ake e beTate? 18 Ajô ete be nga jô na, za aka'a ajô di na, Mone nté ? Bi ne te yem jam a jô. 19 Yésus a nga yeme na, b'akômbo sili nye ; ane a nga jô be na, Ye mi asilane miabebien minsili ajô di, amu m'ate jô na, Mone nté, mi aye bo te yene ma ; a mone nté mfe, mi aye yene ma ? 20 M'abele fo'o ane m'ajô mia na, mi aye yi du a yôn, ve si nyô j'aye vak. Mia mi aye veban ôlun e nlem, ve ôlune vienan vi aye veñesane mevak. 21 Eyoñ ese minga a kô'ôlô mie, a tabe éyôé, amu awolo dé é kpwaaneya. Ve éyoñ ése a biaéya mon, a ne te fe beta simesane mbia mintae ya été, amu meva'a a bili na môt a bialéya e si nyô. 22 Ajô ete mia fe mi atabe éyôé éyoñe ji, ve m'aye beta yene mia a minlem mienan mi aye vak, a meva'a menan mete teke'e môt a ye vaa mia me. 23 Môs ôte mi aye bo te sili me nsili éziñ. M'abele fo'o ane m'ajô mia na, jam mi aye ja'é Tate, a ye ve mia de, amu jôé dam. 24 Azukui éyoñe ji mi nga bo teke'e ja'é jam éziñ amu jôé dam. Jaka'an, a mi aye nyoñ, ane meva'a menan m'aye jaé.

Me Dañeya Si Nyô

25 Me maneya kobô mia mam ma a minkana. Awolo d'azu éyoñ maye bo te fe kobô mia a minkana, ve m'aye kate mia ajô Tate ne ngeeñ. 26 Môs ôte mi aye ja'é mam a jôé dam ; a me ne te jô mia na, m'aye ye'elane Tate ajô denan, 27 amu na, Tate émien a nye'e mia, amu mi nye'eya ma, a mi buniya na me nga so e be Zambe a zu nne. 28 Me nga so e be Tate, a me zuya si nyô. M'abeta lí'i si nyô a ke e be Tate ? 29 Beye'é bé be nga jô na, Tame yen, éyoñe ji w'akobô bia ne ngeeñ, a bo te ke kane bia nkana éziñ. 30 Eyoñe ji bi ayeme na, w'ayeme mam mese, a na ô ne te jeñe na, môt éziñ a sili wo jam. Ajô ete nde bi abuni na ô nga so e be Zambe. 31 Yésus a nga yalane be na, Mi buniya éyoñe ji , nga ? 32 Mi lôô, awolo d'azu, nde e kpwaaneya fe, ane mi aye tyamelan, môt ase ve ke mfa'a wé, a mi aye lí'i ma étam ; ve me nji bo étam amu Tate a ne e be ma. 33 Me maneya kobô mia mam ma, ane mi aye yene mvo'é e be ma. Ve mfa'a ya si nyô, mi bili étibela'a ; nde vola'ane minlem ; me dañeya si nyô.

Meye'elan Me Yésus

17 1 Yésus a nga kobo mam mete, ane a nga bete mis mfa'a ya yôb, a jô na, A Tat, awolo e kpwaaneya. Wumulu'u mone wôé, nde ete Mon a ne wumulu wo ; 2 Avale fe ane ô nga ve nye ngulenjôan ya jôô minsône mise,

Rev. Matthias MEYE
Secrétaire Général 1961.....

nde e te ba bese ô veyã nye, a ye ve be ényĩñ ya nnôm éto. 3 Nde ényĩñ ya nnôm éto éte, nje jina na, be yeme wo, wo étam ô ne nya Zambee, be yeme fe môť ô nga lôm, Yésus Krist. 4 Mamien me nga wumulu wo e si nyô, éyoñ me nga sondô ésaé ô nga ve ma ne me bo. 5 Nde éyoñe ji, A Tat, wumulu'ú ma womien, a дума me nga bili e be wo, si nyô é ngenan te bo.

6 Me nga liti jôé dôé e be bôt ô nga ve ma, be so'ô e si nyô. Be mbe émbôé, ve ô nga ve me be ; a be ba'aleyã mejô môé. 7 Eyoñe ji be yemeyã na mam mese ô nga ve ma, me so'ô be wo, 8 amu na mejô ô nga ve ma, mme mete me veyã be, be nyoñeyã fe me, be yeme fe bebela na, me nga so e be wo ; a be nga buni na wo ô nga lôme ma. 9 Mamien m'aye'elan ajô dab. Me ne te ye'elan ajô ya si nyô, ve ajô ba ô nga ve ma amu na be mbe émbôé, 10 a mam mese me ne émam me ne émôé, a mam me ne émôé me ne émam, a amu m'aye wum e be be. 11 Nde me se ke fe e si nyô, ve bana be ne e si nyô, a mamien m'azu e be wo. A Mfufube Tate, ba'ale'e be a jôé dôé, di ô nga ve ma, ane b'aye bo jôme jijia avale fe ane bia wo ; 12 Eyoñ me nga too e be be, mamien me nga ba'ale be a jôé dôé, di ô nga ve ma, a me nga kame be, a teke'e môť ya été a nga jañ, nga ve mon ya njañan ane ntilan w'aye tôéban. 13 Nde éyoñe ji m'azu e be wo, a m'akobô mam ma e si nyô, ane be ne bi meva'a mam, me ne njalan e be bebien ; 14 Mamien me veyã be mejô môé, a si nyô é nga siñe be, amu be nji bo ba ya si nyô, avale fe ane mamien me nji bo môť ya si nyô. 15 Me ne te ye'elane na ô vaa be e si nyô, ve na ô kame be mfa'a ya mbia môť ; 16 Be nji bo ba ya si nyô aval fe ane mamien me nji bo môť ya si nyô. 17 Fubu'ú be a benya mejôô . 18 Aval ane ô nga lôme ma, aval ete fe me nga lôme be e si nyô, 19 a m'afubu mamien amu ajô dab, nde ete bebiene fe be ne fuban a benya mejôô.

20 Me ne te ye'elane wo ajô bôte ba étam, ve nalé fe ajô ba b'aye buni ma amu mejô mab, 21 nde ete bese be ne bo jôme jijia avale fe ane wo A Tat, ô ne e be ma, a ma fe e be wo, nde ete fe bebien be ne bo e be bia, ane si nyô j'aye buni na wo ô nga lôme ma. 22 Nde дума ô nga ve ma, me veyã be de, nde ete be ne bo jôme jia, avala fe ane bia wo bi ne jôme jia : 23 ma e be be, a womien e be ma, ane b'aye bo jôme jia, nde ete si nyô j'aye yeme na, wo ô nga lôme ma, a na ô nga nye'e be avale fe ane ô nga nye'e ma. 24 A Tat, ajô ba ô nga ve ma, m'ayi na e vôm mamien me too, bana fe be tabe bia be be, ane b'aye yen étôťo'ô jam mamien, nje ô nga ve ma amu ô nga nye'e ma, te yen mbôka'a si ô za bô'ôban. 25 A zôsôa Tate, akosabo si nyô é nga bo te yeme wo, ve ma me nga yeme wo, a bana fe be nga yeme na wo ô nga lôme ma ; 26 me nga liti be jôé dôé, a m'aye beta liti be de, nde ete nye'an ô nga nye'e ma ô ne bo e be be, a ma fe e be be.

Nkoñan A Mbiane Yésus

(Mat 26 : 47-56 ; Mark 14 : 43-50 ; Luk 22 : 47-53)

Rev. Matthias MEYE
Secrétaire Général 1961.....

18 1 Eyoñ Yésus a nga mane kobô mejô mete, a nga kôlô, ba bea beye'é bé, a dañ ôtôñ Kédron, a ke vôm afup é nga too. Emien a nga nyiin été, ba be beye'é bé. 2 Nde Yudas fe, môť a nga koñe nye, a nga yeme vôm ate, amu na biyoñ abui Yésus ba be beye'é bé be nga sulane wôé . 3 Ajô e te éyoñ Yudas a nga mane nyoñe nsamba bezimbi a bekeminlôman be so'o be minlô beprêtre a Befarésias, a nga kee be wôé, be bili ngôé, a belambe, a biôm mewosan. 4 Ajô ete Yésus, amu a nga yeme mam mese m'kui e be nye, a nga jô be na, Mi ajeñe za ? 5 Be nga yalane nye na, Yésus môť ya Nazaret. Yésus a nga jô be na, Me nyô ! Nde Yudas fe, môť a nga koñe nye, ba be be. 6 Ajo e te éyoñ a nga jô be na, Me nyô, Be nga timan mvumvua, a ku bekayale. 7 ajô ete a nga beta sili be ne, Mi ajeñe za ? Be na, Yésus môť ya Nazaret. 8 Yésus a nga yalane na, m'ate kate mia na, Me nyô. Ajô ete nge ma mi ajeñ, jôka'ane bana be ke. 9 A nga jô nalé, nde ete njôan a nga jô w'aye tôébane na, Ba ô nga ve ma, me nga bo te dimii wua ya été. 10 Ajô ete, Simôn Pétrus, amu a nga bili fansoñ, a nga té je, a ba'é ôlo njô beprêtre, a seme vie alo ya mbonnôm. Olo ôte ô too jôé na Malkus. 11 Ajô ete Yésus a nga jô Simôn Pétrus na, Somô fansoñ abam ! Elaé Tate a veyá ma, ye m'aye bo teke'e je nyu ?

Yésus Osu Njô Beprêtre

(Mat 26 : 57, 58 ; Mark 14 : 53, 54 ; Luk 22 : 54)

12 Ajô ete, nsamba bezimbi, a évete jab, a bekeminlôman ya Beyude be nga bi Yésus a ka'a nye. 13 Ane be nga tate kee nye e be Anas, amu a mbe ntyia Kaifa, môť a mbe njô beprêtre mbu ôte. 14 Kaifa ate nye a nga bôndé Beyude fe'e na, e ne mvaé nge môte wua a wu amu ayoñ.

Pétrus A kate Yésus

(Mat 26 : 69, 70 ; Mark 14 : 66-68 ; Luk 22 : 55-57)

15 Ane Simôn Pétrus a nga ke a tôñe Yésus, baa ñye'é mfe. Nye'é ate , njô beprêtre a nga bo a yeme nye, baa be Yésus be nga nyiin élume njô beprêtre été, 16 ve Pétrus a nga tele mbé si atan. Ajô e te ñye'é mbo'o ate, nyô njô beprêtre a nga bo a yemek, a nga ke a kobô minga a mbe mba'ale na, a nyiñili Pétrus élum été. 17 Ajô e te mingabisaé a nga ba'ale mbé a nga jô Pétrus na, Ye wo fe ô ne môť ya beye'é be môte nyô ? Nye na, me nji bo nye. 18 Nde bebobisaé a bekeminlôman be nga tele wôé, be maneya kôbane nduan amu aveb e nga too ; ane be nga wobane nduan. Pétrus fe a mbe nsamba wob, a tele, a woba'ane nduan.

Njô Beprêtre A Sili Yésus Minsili

(Mat 26 : 59-66 ; Mark 14 : 55-64 ; Luk 22 : 66-71)

19 Ajô e te njô beprêtre a nga sili Yésus ajô bey'é bé, a ajô ñye'elane wé. 20 Yésus a nga yalane nye na, Mamien me maneya kobô si nyô ne ngeëñ. Kom ése me nga ye'ele ve e Sinagôg, a e tempel été, vôm Beyude bese b'asulan, me nga bo te kobô jam éziñ asoé. 21 W'asili ma ajô e te amu jé ? Sili'i ba be nga wô'ô jam me nga kate be. O lôô, bebien b'ayeme mam me nga jô. 22 Nde éyoñ a nga mane kobô mam ma, môte wua ya bekeminlôman be nga tele wôé a nga bibi Yésus abae, a jô na, Ye avale di nde w'ayalan njô beprêtre ? 23 Ane Yésus a nga yalane na, nge m'ate kobô abé, liti'i mbia jam ate. Ve nge m'ate kobô mvaé, amu jé w'abibi ma ? 24 Ajô ete Anas a nga lôme nye nka'an e be Kaifa, njô beprêtre.

Pétrus A Beta Kate Yésus

(Mat 26 : 71-75 ; Mark 14 : 69-72 ; Luk 22 : 58-62)

25 Simôn Pétrus a mbe valé, a tele, a woba'ane nduan. Ajô ete be nga jô nye na, Ye wo fe ô ne môte ya beye'é bé ? Nye ve kat, a jô na, M'abôbo été . 26 Môte wua ya bebobisaé be njô beprêtre, évuvuman ya môt Pétrus a nga sem alo, a nga jô na, Ke mamien m'ate yene wo afup mia nye ? 27 Ajô e te Pétrus a nga beta kat ; nde éte été nnôme kup a nga loñ ;

Yésus Osu Pilatus

(Mat 27 : 1, 2, 11-14 ; Mark 15 : 1-5 ; Luk 23 : 1-5)

28 Ajô ete be nga kee Yésus akôlô e be Kaifa, a kee nye nda ngovina ésala tyé. Ane bebien be nga bo te nyiin e nda ngovina, be za ve bebien nsem a bo te di Paska. 29 Ajô ete Pilatus a nga kui atan e be be, a jô na, Za ajô mi abô'ôlô môte nyô ? 30 Be nga yalane na, Nge môte nyô a too bo mboabé, ve bi nga ye bo te kee wo nye. 31 Ajô e te Pilatus a nga jo be na, wôna miababien, nyoñane nye, mi tyi'i ajô dé aval ane metiñe menan me né. Beyude be nga jô nye na, E nji bo bia nkañesane na, bi wôé môt . 32 Be nga jô nalé nde e te mejô Yésus nga jô me ne tôéban, nltan a

na liti avale awu a yiane wu. 33 Ajô e te Pilatus a nga beta nyiin e nda, a loene fe Yésus, a jô nye na, Ye wo ô ne Njô Beyude ? 34 Yésus a nga yalane na, Ye w'ajô jam e te amu womien, ye bôte befe be nga kate wo ajô dam ? 35 Pilatus a nga yalane na, ye me ke me ne mone Beyude ? Ayoñe dôé womien a minlô beprêtre b'ate kee me wo. O nga bo jé ? 36 Yésus a na yalane na, Ejôé jam é nji bo ji ya si nyô. Nge éjôé jam é too bo ji ya si nyô, ve bekeminlômane bam b'ate ye wosane na, me bo te keeban e mo Beyude. Ajô ete éjôé jam é nji bo ji ya vôme nyô. 37 Ajô ete Pilatus a nga jô nye na, o ne njô bôt, nga ? Yésus a nga yalane na, Nde le w'ajô, me ne njô bôt. Amu ajô ete nde me nga bialé de, a amu ajô ete nde me nga zu de e si nyô, ane m'aye kañete benya mejôô. Môt ase a ne nyô ya benya mejôô, nnye a wô'ô tyiñe jam. 38 Pilatus a nga jô nye na, Jé é ne benya mejôô ?

B'ave Yésus Mekua Ya Wu

(Mat 27 : 15-31 ; Mark 15 : 6-20 ; Luk 23 : 13-25)

Nde éyoñ Pilatus a nga mane jô jam ete, a nga beta kui atan a ke e be Beyude, a jô be na, Mamien me ne te yen étom e be nye. 39 Ve mi bili éyeme na, me suu mia môt éziñ éyoñ ya Paska. Ajô e te ye mi ayi na, me suu mia Njô Beyude ? 40 Ajô e te be nga yôtan, be jô'ô na, Sa nyôlé, ve Barabas ! Barabas ate a mbe ze mimfaka.

19 1 Ajô e te Pilatus a nga nyoñe Yésus, a bibi nye nkasa. 2 Ane bezimbi be nga lôñ ékate biyo, a jalé nye nje nlô ; be jalé fe nye évele alô'ô. 3 Ane be nga zu e be nye, be na, Mbôlô ! a njô Beyude ! Be nga bibi nye mebaé. 4 Ane Pilatus a nga beta kui atan, a jô be na, Mi lôô, m'azuu nye atan vôm mi né, nde e te mi aye yeme na, me nji yen étom e be nye. 5 A jô e te Yésus a nga kui atan a be'e, a be'e ékate biyo a évele alô'ô. Ane Pilatus a nga jô be na, Mi lôô môt ate ! 6 Ajô e te éyoñ minlô beprêtre a benkeminlôman be nga yene nye, , be nga yôtane na, Tyele'e nye e Krôa ! Tyele'e ne e krôa ! Pilatus a nga jô be na, Miabebien, nyoñane nye mi tyelé nye krôa, amu mamien me nji yene nye étom. 7 Beyude be nga yalane nye na, Bia bi bili atañ, nde aval ane atañ d'ajô, a yiane wu amu a nga bo émien Zambe . 8 Ajô e te éyoñ Pilatus a nga wô'ô mejô mete a nga dañe ko woñ ; 9 Ane a nga beta nyiin e nda, a jô Yésus na, ô nga soso vé ? Ve Yésus a nga bo te ve nye éyalan. 10 Ajô e te Pilatus a nga jô na, Ye ô ne te yalan ? Ye ô nji yeme na, Me bili ngul ya suu wo, a me bili ngul ya tyelé wo krôa ? 11 Yésus a nga yalane na, ô nga ye bo te bi ngul ya bo me jame dada, nge é nga bo te veban e be wo, mfa'a ya yôb. Amu ajô e te nde , môt a te kee me wo, a boya beta abé. 12 Amu ajô ete nde Pilatus a nga jeñe na a suu nye, Ve Beyude be nga yôtan, be na, Nge w'asuu môte nyô, ô nji bo mvôé Kaiza. Môt ase a bo émien njô bôt, a wosane Kaisa.

13 Ajô ete éyoñ Pilatus a nga wô'ô mejô mete a nga kuli Yésus atan, a tabe si éto mejô, e vôm b'aloene na, Nseñ mbô'ane mekok, ve e nkobô Hébru na, Gabata. 14 Nde môs ô mbe wu ya nkômesane Paska, bebé ane zañe môs. Ane Pilatus a nga jô Beyude na, Mi lôô, Njôô wônane nyô ! 15 Ajô e te Beyude be nga yôtane na, Va'a nye ! Va'a nye ! Tyele'e nye e krôa ! Pilatus a nga jô be na, Ye me tyelé njôô wônane e krôa ? Minlô beprêtre be nga yalane na, Bi nji bi njôô mfe ve Kaiza. 16 Ajô e te Pilatus a nga kee be nye na, a tyeléban e krôa.

B'atylé Yésus E Krôa

(Mat 27 : 32-44 ; Mark 15 : 21-32 ; Luk 23 : 26-43)

Ajô ete be nga kee Yésus. 17 Ane a nga kôlô émien a be'e krôa, a kui vôm be nga loene na, vôm ya ékôkoé nlô, nnye a nga loban e nkobô Hébru na, Gôlgôta. 18 Vôm ate nye be nga tyelé nye e krôa, ba be bôte befe bebaé, nyina li, nyina li, Yésus a tyele e zañ. 19 Nde Pilatus a nga tili abam, a ba'é de e krôa yôb ; e mbe ntilane na, **YESUS, MOT YA NAZARET, NJO BEYUDE**. 20 Ajô ete Beyude abui be nga lañ abame di, amu vôm Yésus a nga tyeléban e krôa, a mbe bebé nlam. Abam e mbe ntilan e nkobô Hébru, a wu Latan, a wu Grek. 21 Ajô ete minlô beprêtre ya Beyude be nga jô Pilatus na, Te tili na, Njôô Beyude, ve na, Nyina a nga jô na, Me ne Njôô Beyude. 22 Pilatus a nga yalane na, Jam me tiliya, nde ete me tiliya.

23 Ajô ete éyoñ bezimbi be nga mane tyelé Yésus e krôa, be nga nyoñe mimbote mié a kabe mie ngab ényin, mone bezimbi ase ngabe jia, nalé fe éwomane jé. Nde éwomane éte é mbe te nloko'ô, é too ntiñan ngum aso yôb akui si. 24 Ajô ete be nga jôane na, Mbo'ane te nyabe ji bifus, ve bi do je abia, bi yene nyô a ye tyi'i je, ane ntilan w'aye tôébane na,

“ Be nga kaban mimbote miam,

A ngômesane jam, be nga do je abia .”

Ajô ete be nga bo fo'ô mam mete. 25 Be nga tele bebé krôa Yésus na , nyia, monyaña nyia, Maria nga kléôpas, a Maria Magdaléna. 26 Ajô ete éyoñ Yésus a nga yene nye, a yene fe ñye'é a nga bo a nyeke'e, a tele nye bebé, a nga jô nyia na, A Minga, ô lôô, mone wôé ! 27 Mvus éte a nga jô ñy'é ate na, O lôô, nyua wôé ! nde akôlô awolo ete, ñye'é ate a nga nyoñe nye e nda jé.

Rev. Matthias MEYE
Secrétaire Général 1961.....

Awu Yésus

(Mat 27 : 45-56 ; Mark 15 : 33-41 ; Luk 23 : 44-49)

28 Mvus éte éyoñ Yésus a nga yene na, mam mese me maneya, ajô ete ane ntilan ô ne tôéban a nga jô na, M'awô'ô évé. 29 Vie'e éziñ ô nga tele wôé, ô too njalan a wain é mbe sañ . Ajô ete be nga dube vovô e wain é mbe sañ, be some nye e ntya hisôp, a kee nye nye anyu. 30 Ajô ete éyoñ Yésus a nga nyoñe wain é mbe sañ, a nga jô na, E maneya ! ane a nga jome nlô wé, a suu nsisim.

B'ajii Yésus Akoñ E Mvaé

31 Amu môs ôte ô mbe wu ya Nkômesan, mimbim mi za lí'i mi tyele krôa e môse sabbat, amu môse sabbat ôte ô mbe beta môs, ajô ete Beyude be nga ye'elane Pilatus na, be bu'u be mebo, a vaa be. 32 Ajô ete bezimbi be nga zu, be bu'u môt ya ôsu mebo, a ma me nyô mbok baa nye be nga tyeléban e krôa. Nde akui be nga kui e be Yésus, éyoñ be nga yene na a wuya, be nga bo te bu'u nye mebo. 34 Ve mone bezimbi wua ya été a nga jii nye akoñ e mvaé, a été été metyi a mendim bi nga kui. 35 A môt a yeneya jam ete, nnye a kañete de, a nkañetane wé ô ne bebela. Nnye ate fe a yeme na, a kobô bebela, nde ete mi aye buni. 36 Amu na mam mete me nga boban ane ntilan w'aye tôéban na, Bivese bié, teke'e jia j'aye bu'i. 37 A ntilan mfe w'ajô na, B'aye fombô môt be nga jii akoñ.

B'ajame Yésus E Soñ

(Mat 27 : 57-61 ; Mark 15 : 42-47 ; Luk 23 : 50-56)

38 Mvus éte Yôsef, môt ya Arimatéa, a too ñye'é Yésus, ve asoé, amu nkoan a nga ko Beyude woñ, a nga ye'elane Pilatus na, a vaa mbime Yésus. Ane Pilatus a nga kañese. Ajô ete a nga zu vaa mbime wé. 39 Nde Nikôdémus fe, nyô a nga zu e be Yésus alu ôsusua, a nga zu, a za'a fe mbon ya wo'o baa aloés bi too mbunda'ane, tañe kilô mewôm mela. 40 Ajô ete a nga nyoñe mbime Yésus a diñe wô bandombo bindenlé, nduban a biôm bi ne mbamba menyum été, aval ane éyeme Beyude b'akôm mbim é né. 41 Nde afub e mbe vôm a nga tyeléban e krôa, nalé fe mfefé soñ afub ete été, be ngenan te tame bôôé mbim été. 42 Ajô ete, amu môs ôte ô mbe wu Beyude be nga kômasan, amu soñ éte é mbe bébé, be nga jame Yésus vôm ate.

Rev. Matthias MEYE
Secrétaire Général 1961.....

Nwômane Yésus

(Mat 28 : 1-10 ; Mark 16 : 1-8 ; Luk 24 : 1-12)

20

1 Nde môt ôsu ya sondô, Maria Magdaléna, a nga kui soñ ésala tyé, éyoñ éte dibi é ngenan ; ane a nga yene na akok e nto mvasan e soñ. 2 Ajô e te a nga ke mbil e be Simôn Pétrus, a e be ñye'é mbo'ô Yésus a nga nye'e, ane a nga jô be na, B'ate vaa Nti e soñ, a bi ne te yem vôm b'ate bôôé nye. 3 Ajô e te Pétrus a nga ke baa ñye'é mbo'ô ate, be kele e soñ. 4 Nde bebaane be nga ke mimbil nsamba wua, ane ñye'é mbok a nga dañe Pétrus e mbi, a taté kui e soñ. 5 Nde éyoñ a nga kumbu a bôt e soñ été, a nga yene bendombo be bôt mvutane vôm étam. 6 Wôna Simôn Pétrus a nga zu tôñe nye mvus, ane a nga nyiin e soñ été ; ane a nga yene bendombo bindelé be bôt, 7 a éyañese é nga tii nye e nlô, é nnji bômbô vôm bendombo bindelé be nga bôt. 8 Ajô e te ñye'é mbok, nyô a nga taté kui e soñ, nnye fe a nga nyiin été, ane a nga yen a buni. 9 amu be ngenan te yem ntilan w'ajô na ; a yiane wômô akôlô miñwuan. 10 Ajô e te be nga beta bulan e vôme wob.

Yésus A Yené E Be Maria Magdaléna

(Mark 16 : 9-11)

11 Ve Maria a nga tele e fefele soñ, a yiik. Nde a yiik nalé, ane a nga kumbu a bôt e soñ été, 12 a yene beénglele bebaé, be be'e bifumulu mengômesan, be too si e vôm mbim Yésus w'abôô, nyina mfa'a ya nlô, nyô mbo'ô mfa'a ya mebo. 13 Ane be nga jô nye na, A minga, amu jé w'ayi du ? A nga jô be na, Amu b'ate vaa Nti wom, a me ne te yeme vôm b'ate bôô nye. 14 Eyoñ a maneya kobô mejô mete, ane a nga veñesan mfa'a ya mvus, a yene Yésus a tele, ve te yeme na, Yésus e le. 15 Yésus a nga jô nye na, A minga amu jé w'ayi du ? W'ajeñe za ? Maria a nga si'a ko na a ne mba'ale afub ete. Ane a nga jô nye na, A Nti nge wo w'ate to'é nye, kate me vôm w'ate bôôé nye, a mamien m'aye be'e nye. 16 Yésus a nga jô nye na, A Maria ! a nga veñesan, a jô nye e nkobô Hébru na, A Rabbuni ; (e ne na, A Nye'ele). 17 Yésus a nga jô nye na, Te bi ma, amu me ngenan te bet e be Tate ; ve kele' e be bobajañ, a jô be na, M'abete be Zambe Tate wom a Eso wônán, e be Zambe wom a Zambe wônán. 18 Maria Magdaléna a nga ke kete beye'é na, Me yeneya Nti, a mam a nga jô nye.

Yésus A Yené E Be Beye'é

(Mat 28 : 16-20 ; Mark 16 : 14-18 ; Luk 24 : 36-49)

Rev. Matthias MEYE
Secrétaire Général 1961.....

19 Ajô e te éyoñ ngô'é é nga bo, môs ôte ôbien, môs ôsu ya sondô, mimbé vôm beye'é be nga too mi maneya diban, amu nkoan be nga ko Beyude woñ, Yésus a nga zu, a tebe be e zañ, a jô be na, Mvo'é é bo'o e be mia ! 20 Nde éyoñ a maneya jô éfia éte, a nga liti be mo a mvaé. Ajô e te beye'é be nga wô'ô mevak éyoñ be nga yen Nti. 21 Ajô e te Yésus a nga beta jô be na, Mvo'é é bo'o e be mia ! aval ane Tate a nga lôme ma, ma fe m'alôme mia. 22 Nde éyoñ a maneya jô éfia éte, a nga kute be mvebe, a jô be na, Nyoñan Mfufub Nsisim. 23 E be ba mi ajamé mam abé, me nto be njaman ; e be ba mi aba'ale me, me nto mba'alan.

Yésus Ba Tômas

24 Nde Tômas, môte wua ya beye'é awôm a bebaé, nnye b'aloene na, Didimus, a nji tabe éyoñ Yésus a nga zu. 25 Ajô e te beye'é bevo'o be nga jô nye na, Bi yeneya Nti. a nga jô be na, Nge me te yen bifele mesen e mo mé été, me beme fe ônyu viam bifele mesen été, a beme fe wo e mvaé jé, m'aye ke buni. 26 Mvus melu muam, beye'é be nga beta tabe e nda été, a Tômas a too nsamba wob. Yésus a nga zu, éyoñ éte mimbé mi nto ndiban, a tebe be e zañ, a jô na, Mvo'é é bo'o e be mia ! 27 Mvus éte a nga jô Tômas na, Beme' ônyu viôé va, ô fombô mo mam ; ô same fe wo, a beté wô e mvaé jam. Te bo nyô a ne te buni, ve nyô a buni. 28 Tômas a nga yalan, a jô nye na, A Nti wom, A Zambe wom ! 29 Yésus a nga jô nye na, Amu ô yeneya, ajô e te ô buniya. Ba be ne te yen, ve b'abuni, mmbe be ne mvom.

Nlô Efia Ya Kalate Yôhanes

30 Yésus a nga bo mendem mefe abui, ôsu ya beye'é bé, mme mete me nji bo ntilan e kalate nyina été. 31 Ve mana me ne ntilan ane mi aye buni na, Yésus a ne Krist, Mone Zambe, a na, mbunan mi abuni, mi aye bi ényiñ amu jôé dé.

Yésus A Beta Yené E Be Beye'é Zañbwa

21 1 Mvus éte Yésus a nga beta liti émien e be beye'é, e mañ ya Tibéria, nde a nga liti émien ana. 2 be nga too vome wua, Simôn Pétrus a Tômas, b'aloene na Didimus, A Natanel, môt a so e Kana ya Galiléa, a bone be Zebedias, a bôt befe ya beye'é bé. 3 Simôn Pétrus a nga jô na, M'ake wôé kos. Be nga jô nye na, Bia be wo bi ake. Ane be nga

Rev. Matthias MEYE
Secrétaire Général 1961

kôlô a dañ éfunga été. Alu ete ébien be nga bo te bi jôm. 4 Nde éyoñ tyé é nga ke j'alendé, Yésus a nga tele étebe mañ, ve akôsabo nalé, beye'é bé be nga bo te yeme na, a ne Yésus. 5 Ajô ete Yésus a nga jô be na, A bongô, ye mi bili jôme ya di ? Be nga yalane nye a, Momo. 6 Nde a nga jô be na, Yaan avot mfa'a éfunga ya mbonnôm, a mi aye yen. Ajô ete be nga ya de, be nga bo te ngul ya bete de, amu abui kos. 7 Ajô e te ñye'é ate Yésus a nga bo a nyeke'e, a nga jô Pétrus na, Nti le ! ajô ete Simôn Pétrus, awô'ô a nga wô'ô na, Nti le, a nga tiñeti éwoman jé angeteñ, amu a mbe soé, ane a nga wua nyôl e mañ été, 8 Ve beye'é bevo'o be nga zu, be too mone éfunga été, amu kindi'i é nji fe bo ôyab, ve bebé ane mita ntet, be dutu'u avote kos. 9 Ajô e te éyoñ be nga mane sis e kindik, be kôlôya éfunga, be nga yen ma'a me nduan, nalé fe kos é bete été yôb, a fembé. 10 Yésus a nga jô be na, Za'ane kos mi ate bi éyoñe ji. 11 Simôn Pétrus a nga dañ éfunga été, a dutu avot e kindik, njalan a beta be kos, tañ ntet a mewôm metan a éla ; akôsabo é mbe étua abui nalé, ve avot e nga bo te nyaé. 12 Ane Yésus a nga jô be na, Za'a dian ! teke'e môte wua ya beye'é a nga zômbô sili nye na, O ne za ? amu be nga yeme na, Nti le. 13 Yésus a nga zu, a nyoñe fembé éte, a ve be je, aval ete fe kos. 14 Dina e ne aliti lale Yésus a nga litiban e be beye'é éyoñ a wômôya akôlô miñwuan.

Yésus Baa Pétrus

15 Ajô ete éyoñ be nga mane di, Yésus a nga jô Simôn Pétrus na A Simôn mone Yônas, a wo a bôte ba , ye w'adañe nye'e ma, A nga jô nye na, Yaa, A Nti, w'ayeme na, m'adiñe wo. Yésus a nga jô nye na, O bo ô va'a mintômba miam bidi. 16 A nga beta jô nye ajô baa na, A Simôn mone Yônas, Ye w'anye'e ma ? a nga jô nye na, Yaa, A Nti, w'ayeme na, m'adiñe wo. Yésus a nga jô nye na, O bo ô ba'ale bone mintômba bam ! 17 Yésus a nga jô nye ajô lale na, A Simôn, mone Yônas, ye w'adiñe ma ? Pétrus a nga wô'ô ôlun e nlem amu a nga jô nye ajô lale na, Ye w'adiñe ma ? Ane a nga jô nye na, A Nti, w'ayeme mam mese. W'ayeme na, m'adiñe wo. Yésus a nga jô nye na, O bo ô va'a bone mintômba bam bidi. 18 M'abele fo'o ane m'ajô wo na Eyoñ ô mbe ndôman, ô nga bo ô yemete'e ases angeteñ, a ke w'awulu mfa'a ôse ô nga bo ô kômbô'ô ke. Ve éyoñ w'aye bo nnôm, w'aye same mo môé, a môt mfe nnye a ye yemete wo ases angeteñ, a ke wo mfa'a ô ne te kômbô ke. 19 A nga kobô éfia éte, ane a ye liti aka'a awu a ye wumulu de Zambe. Nde éyoñ a nga mane jô éfia éte, a nga jô nye na tôñe ma !

Yésus Baa Nye'é A Nga Nye'e

20 Eyoñ Pétrus a nga veñesane mvus, a nga yene ñye'é Yésus a nga bo a nyeke'e, a tôñe be ; nnye ate a nga ye'ebe Yésus e tôé éyoñ ya ndian ôte, a jô fe na, A Nti, za a ne môt a koñe wo ? 21 Ajô ete, éyoñ Pétrus a nga yene

Rev. Matthias MEYE
Secrétaire Général 1961.....

môte ate, a nga jô Yésus na, A Nti, môte nyina ke, aya ? 22 Yésus a nga jô nye na, Nge m'ayi na, a tabe akekui m'azu, ô ne za ajôô été ? Wo, tône ma. 23 Ajô e te njôane wu ô nga mialan e bobenyañ été na, ñye'é ate a ye bo te wu. Ve Yésus a nji jô na, a ya bo te wu, ve na, Nge m'ayi na, atabe akekui m'azu,[ô ne za ajôô été ?]

24 Nde Yésus a nga bo mam mefe abui, mme mete, nge me ne tiliban, jam ese e vôme wé, m'ave'e na, ja'ana si nyô ébien é nga ye bo te yiane bekalate be nga tiliban.



Rev. Matthias MEYE
Secrétaire Général 1961.....